

BWIKADI BWÀ NZAMBI

KABÜYÌ BUJINGULULA

 Mpindyewu pàdì misumbà yètù mikesè apa, netùteetè bwà—bwà kulwijakaja, kupàtuka bwà twamòna mwà... tudi tukwàta mudimu bwà kiipàcìlà kàmwèpelè aka, bwà nwènù kujingulula Bwikadi bwà Yesù Kilistò. Nwamònu anyi? PiikalàYepù, dībà adi, mòna's, byònsò bwalu bwàbì mbutùùke. Yèyè wàkenza Dfìyì. Ùdi kaaba aka bwà kuDishindikà. Ùdi ùjaadika nè Yèyè neàDishindikè. “Yèyè ùdi ànu umwèumwè awu makèèlèlè, leelù, too nè kashidi.” Tudi baMumòne ùcyènza makèèlèlè dilòòlò awu, kakùyì kalèma to; tudi tuMumòna, ku dilòòlò nè ku dilòòlò, nè ku ditùkù nè ku ditùkù, nè ku cidimu nè ku cidimu. Kacya musangu nànsha wùmwe Yèyè kàtukù mudyànjlè kwamba ní ncinyì ní ncinyì, nànsha byòbì nè cívwa ndībà kaayì, dībà divwàcì cifwànyine kwenzeka, pa misangu binunu, wùvwàbì kabìyì bipwàngàne menemene, pa dībà, nè bijaalàme to. Mmunyì mùdìci mwà...? Mbanganyì bàdì bamanyè aci, nè bamanyè mudimu wà bwambi, nè bamanyè nè aci ncilelèlè? Ki bwalu mbwòbù abu's. Musangu nànsha wùmwe, nànsha byà munyì, nànsha mùvwàbì kabìyì mwà kwenzekakù to, byàkenzeka ànu mùshindù wùmwe wùmwe awu. Yèyè ùdi Nzambi's! Nènku bu twètù ànu mwà kujingulula aci, kucìkwàta's!

² Nènku mpindyewu tudi ànu nè cikondo cìpì cyà kwikala kaaba aka. Ngèèla meeji nè malòòlò makwàbò àsàtù, anyi malòòlò makwàbò àbìdì nè ditùkù, paanyimà pàà dilòòlò edi. Ngèèla meeji nè mu mapingaja à dyàlumingu ke disangisha dyà dyoya naadi. Tudi tuteeta bwà kujikija mu dyàlumingu mu mapingaja bwà bampaasàtà nè bantu bònsò... Katwèna baswè kunùpangisha bwà kuya mu èkèleeziyà wenù to. Tudi ànu baswè kusàkidila bakwàbò ku èkèleeziyà, nè kubàndisha diitabuuja dyènù mu Nzambi unùdì nukwàcila mudimu mu èkèleeziyà wenù. Nwamònu anyi? Nènku katwèna baswè bwà biibi byà èkèleeziyà bikànge to, nànsha byà munyì. Tudi baswè bwà nwènù kushàalamù, kàdi tudi ànu tuteeta bwà kunùkwàcisha, bwà kunùkolesha ku mwoyi. Ditàbuluja kadyèna nànsha dyùmvwija nè nkusàkidila bantu bakwàbò ku èkèleeziyà to; ditàbuluja mbwena kwamba nè kufùululula cyùdì naaci aci; ncyà bushùwà, ditàbuluja.

³ Ngàkatàngila musangu kampàndà ku mwelelu wà mbù, kùvwà cipeepà munkaci mwà kutuuta, nè cívwa ànu cìnyùkusha. Mòna's, kacívwa ku mwelelu wà mbù to, cívwa—cívwa nku Dijiba dyà Michigan kwàka. Mvwa mwimàne pambèlu apu

ntàngila mavwala awu pàvwàwu àlwa apu, nè—nè, kaa, mbû awu wùvwa wùtùpika, anyi màyi àtùmpika, nè—nè màtù munkaci mwà kutènkakana. Ke mèmè kudyàmbidila nè: “Cidì munkaci mwà kwenzeka ncinyi?” Mèmè kudyàmbidila nè: “Mòna’s, dijiba’s didi munkaci mwà kwenza ditàbuluja.” Ke cyôci aci. Didi ditùpika nè dinyùkuka, bwà cinyi? Kùdi cipeepèlè cicolè cyà cìvuma munkaci mwà kupwekapù. Mèmè kudyàmbidila nè: “Èè, nudi bamanyè mùdi bwalu anyi? Kakwèna dikwàbò dimata dyà màyi disàkidilamù mpindyewu mene kutàmba àvwàmu pàvwàye ànu mubàtème menemene apu to.” Kamwèna makwàbò màyi to; mmabìndùlùke ànu cyanààna. Èè, mpindyewu, mmabìndùlùkile cinyi’s? Nudi bamanyè citù dibìnduluka dyà màyi dyenza anyi? Àsukula bukooyà bwònsò àbùpàtulamù, àbùtèeka pa mwelelu apu.

⁴ Ke cidì citùkèngela aci, disukudiibwa dyà bupidyà, dibwèla ku mwelelu wa màyi. Kulekela Dîyì dyà Nzambì dyàngata bukòòkeshi. Ke cidì citùkèngela aci, ditàbuluja, nè kusukula bupidyà bwònsò kubwèla pambèlu, nè biishiishi byònsò nè diitabuuja dyà màjimbù, nè bikwàbò. Kupàtuka nè kumòna nè Nzambì ùcidi ànu Nzambì. Ke citùdì twenzela matàbuluja ncyôci aci.

⁵ Mukalenge àtùkwàcishèku patùdì tusungula cyena-bwalu eci nè tucibala bwà dilòòlò edi apa. Mukalenge àbeneshèku dibala dyà Dîyì Dyèndè, didi disanganyibwa mu Maatàayi Munsantu, nshapità wa—wa 12, mvensà wa 38 nè ku wa 42.

⁶ Nènu cyena-bwalu cyànyì dilòòlò edi cidì nè: *Bwikadi Bwà Nzambì Kabùyi Bujingulula*. Makèèlèlè dilòòlò tuvwa twakula bwà Yesù mwikàle umwèumwè awu makèèlèlè, leelù, too nè kashidi, nè bamòne nè Yèyè ùvwa umwèumwè awu makèèlèlè, leelù, too nè kashidi. Mpindyewu Bwikadi Bwèndè, pìikalàYe umwèumwè awu, kì mbùjìngulùdìbwe to. Tùbalàayi.

Pashùishe bàmwè bàà ku bafùndi nè bàà ku Bàfaalèsà kwandamunabo, bàmba nè: Mulongeshi, tudì baswè kumòna cimanyinu cyà kùdì.

Kàdi yèyè wàkandamuna nè kubàmbila nè: Lukòngò lubì nè lwà masandi lùdi lwènda lùkèbangana nè cimanyinu; nè kakwàkwikala cimanyinu cikwàbò cyàfidiibwà kùdìbo to, ànu cimanyinu cyà mupròfetà Yona:

Bwalu ànu mwàkadì Yona matùkù àsàtù à muunya nè àsàtù à bufukù mu difù dyà mushipa wà bàlenà; ke mwikalà kàbìdì Mwànà wa muntu munda mwà matùkù àsàtù à muunya nè àsàtù à bufukù mu mwoyi wà buloba.

Bantu bàà mu Nìniwà nebàjuukè ku lufù ku cilumbulwidi nè lukòngo elu, nè nebàlùpùishè: bwalu bàakanyingalala ku diyìisha dyà Yona; kàdi, mònaayi nè, munène mutàmbe Yona ùdi kaaba aka.

Nènku mukalenge-mukàji wa ku sud neàjuukè ku cilumbulwidi nè lukòngo elu, nè nealùpiishè: bwalu yèyè wàkafùma ku bitùpà byà kuleekùlè byà buloba bwà kutèeleja lungènyì lwà Solòmò; nènku, mònaayi, munène mutàmbe Solòmò ùdi apa.

7 Bwikadi kabüyì bujingulula! Ncinyì cìvwà bantu aba mwà kwikala bèèla meeji bwà bwalu abu? Nzambì ùtu misangu yònsò, bitu ànu mùshindù awu musangu wònsò wùvwàYe ùlwa. Pàvwà Yesù pànwàpa bwà musangu wà kumpàlà, Wàkamba nè: “Nudi—nudi nulaaba lupembà lutòoke nè nulengeja bimanu nè nkita yà bapròfetà, kàdi’s nwàkabeelamu.” Nwamònu’s, cintu kampàndà cìdi cyènzeka, nè cìdi cìpita ciya. “Kàdi Nzambì ùdi ùcisokoka ku mèsù kwà beena meeji nè batàlame, nè ùcibuulwila bàna bàdi baswè kuyiila.” Yesù wàkasàkidila Taatù bwà dyenza dyà nànkù awu. Nwamònu anyi? Cìdi cìpicila ànu pabwìpì nè bantu kàdi kabàyi bàcimanya to.

8 Cileejilu, nwènù beena Kàtòlikè bàdi kaaba aka dilòlò edi aba, nudi bavùlùke kùkaadi ndambù wa bidimu, Jeanne d’Arc, mu France, inàbànza mutekète uvwa bulelèlè... Wàkalombola dibinduluka mu France, kàdi ùvwa bulelèlè musadidi wa—wa Kilistò. Ncinyì cìvwà èkèleeziyà wenù mumwenzèle? Kumwoshila ku dikunji, bu muloji, bwalu ùvwa ùmòna bikèènà-kumòna nè ùvwa wa nyumà. Èkèleeziyà wa Kàtòlikè wàkamwosha, bu muloji, ku dikunji, bwalu yèyè ùvwa wa nyumà nè ùvwa ùmòna bikèènà-kumòna. Ndambù wa bidimu paanyimà, kujandulabò nè mukàji awu ùvwa munsantu. Pan nànkù mu bushùwà bwà bwalu nwàkenza dikengesha dinène, nwàkumbula mibidi yà bansaserdòsè bàakampiishà nè kumwosha abu, nè kuyìmansha mu musùlù. Mu bushùwà bwà bwalu, mu cyòci aci, nudi benzè didikèngesha dinène bwà bwalu abu, bwà dyumbula dyà mibidi yà bansaserdòsè ayi.

9 Mpindyewu, mu matùkù à bapròfetà, cyàkenzekà ncinyì? Bàakenza cintu cimwècimwè aci. Kabààkabàjingulula to too nè pàkaavwàbo bamanè kuya, mudimu wàbò wà bwambi mujikè, mupàtulemu Basungula, nè pashìishe paanyimà pàà bóbò bamanè kuya bàakajingulula nè kwàkadi mupròfetà munkací mwàbò.

10 Yesù, Yèyè wàkalwa pa buloba. Mutèèkiibwa munda Mwèndè ùvwa n’Nzambì Taatù. “Mèmè nè Taatù Wanyì tudi umwe. Taatù Wanyì mmusòmbèle munda Mwànyì. Kì m’Mèmè udi wenza byenzedi to, kàdi n’Taatù Wanyì. Kàdi Mèmè nciyì ngèenza byenzedi byà Taatù Wanyì to, kanùNgiitabùùjì to.” Mpindyewu, bu nwènù mwà kumòna pààkalwàYe, pabwìpì nè cyà pa makùmi citèemà cimwè—cimwè cyà bàà pa buloba cyàkamanya nè Yèyè ùvwa mene pa buloba mu ciinè cikondo aci, kàdi pèndè Musùngidi wa bàà pa buloba. Nè pashìishe kabààkajingululakù nè Yèyè ùvwa Nganyì to, nànsha mene èkèleeziyà anyì muntu mukwàbò nànsha umwe, bu nànkù’s,

mu mùshindù wà nè bààkaMupoopela pa nkùrusè, kujiikiibwa, nè kubìlka ku lufù mu ditùkù diisâtù, kumpâlâ mene kwâ kumanyabò nè Yèyè ùvwa Nganyì.

¹¹ Bùdi bùbwela bùpâtuka, kàdi bantu kabàyi bàbùjingulula to too nè mwikalabu bupite, nè, bôbò, bwalu kacitukù cìkùmbanangana nè tèlòlòjì wabò to, kacitukù cìkùmbanangana nè cikondo cyâ ditùkù adi to. Nwamònu's, cìdici, bàdi misangu yònsò ànu nè mwoyi mu dibàlakana dyâ cikondo cikwàbò, misangu yònsò.

¹² Cyàkenzà nè kabààkiitaba Yesù to, mbwalu bàvwa nè mwoyi mu dibàlakana dyâ Mikenji. Nènku pààkalwà Yesù, kàvwa ùbèngangana nè Mikenji to, kàdi wàkalwa bwâ kuuja Mikenji, èè, kabàvwa mwâ kuMwitaba to bwalu Mukenji Wèndè kawùvwa menemene ànu mùshindù wùvwàbò bôbò bacìvwije twitabàayi awu to, nè cìvwa cìbùkidiibwa dîbâ adi nè mbilele. Kàdi Yèyè kààkalwa bilondèshile bilèlè byàbò abi to. Kààkalama bilèlè byàbò abi to. Nènku mu bulelèlâ Yèyè wàkabitonkola, nè kubisùnsula, nè—nè kwenza bintu bìvwa bibènganganà naabì, mu mùshindù wà nè bàvwa bèèla meeji nè Yèyè ùvwa munkaci mwâ kupandulula maèkèleeziyâ. Kàdi kabàvwa mwâ kuMwakidila to bwâ Mukenji Wèndè. Nènku twètù bònsò tudi bamanyè leelù ewu nè Yèyè wàkalwa ànu menemene mu mulongo wâ cipròfeta cyâ Nzambì, kàdi kabàvwa bacimanyè dîbâ adi to.

¹³ Kàdi's cidi mwâ kwenzeka cyàkàbìdì, nè katùyi bafwànyine kuçimanya to. Ndi ndifwànyikijìla nè bu Yèyè mwâ kumwènèka cyâ bushùwâ dilòlòlò edi, mbifwànyine kwikala bibènganganà bikolè nè byònsò bitùdì badifwànyikijìle mu mbòdì yetù, nè mu bilongelu byètù nè bikwàbò, nkufwànyine kwikala bantu bakesè menemene bààjingululâ cìvwa munkaci mwâ kwenzeka. Wàkamba nè bìvwa mwâ kwikala nànu, mùshindù wàlwàYe.

¹⁴ Mpindyewu, bu mùvwàbì nè Yesù ùvwakù mumanyishìbwe bilondèshile Mifundu menemene ku Mifundu, nè Bafundi nè Bàfaalèsà bàà ditùkù adi kabàvwa mwâ kuMujingulula to. Bwâ cinyi kabààkaMujingulula, bwâ cinyi kabààkenza nànu? Bwalu bàvwa badifwànyikijileci mu mùshindù kampàndâ mukwàbò. Ke mwaba wàkabàmbila Yesù nè: “Kenkètaayi Mifundu, bwalu mu yôyi amu mmunùdì nwela meeji nè nudi nè Mwoyi wâ Cyendèlèlè, kàdi yôyi ayi's ki yidì yimfidila Mémè bujaadiki.” Nwamònu anyi? Mpindyewu Yèyè wàkalwa ànu menemene bilondèshile Mifundu. Kàdi bàvwa badifwànyikijileci pàmwàpa nè bu Yèyè mwâ kulwa, pàmwàpa Maasiyâ ùvwa mwâ kwenza cyàkenzà Mòsà aci, anyi cyàkenzà Noà aci, kubìibakila bwâtù anyi cintu kampàndâ, cikwàbò. Kàdi, cidi cyènza nè Yèyè àlwe mu mùshindù wàkalwàYe awu, kabàvwa badifwànyikijileci to; mu Mifundu nè bilèlè byàbò, kabivwa bibàlongèshe to; pa nànu bantu bàvwa mu cibwejàkàjì mu mùshindù wà nè kabàvwa bamanyè cìvwa munkaci mwâ kwenzeka to.

15 Ndi ndikonka aci ní ncifwànyine kwenzeka leelù ewu's? Ndi ndikonka ní ncifwànyine kwikala cishilàngàne nè cidi bilèlè byètù bitùlongèshe's? Nènkù cidi mwà kulwa, nè cintu kampàndà cifwànyine kupitakanamù kàdi katùyì bafwànyine mene kumanya too nè piikalàci cimanè kupita, nè pashiishe nkujikè. Aci's cidi ànu bu mùshindù wàlwàci.

16 Nudi bamanyè nè, pàakalwà Yone Mubàtiiji mu cyalu, uvwa mudyànjila kwamba kacya ànu ku Mukàndà wà Yeshàayi, kùkaadi nkàmà yà bidimu? Bidimu bitwè ku nkàmà mwandamukùlù, Yeshàayi wàkamba cipròfetà, ngèela meeji, kumpàlà kwà dilwa dyà Kilistò. Nuvwakù bamanyè nè Yone wàkalwa menemene ànu mùvwa Yeshàayi mwambè nè yèyè neàlwe amu, wàkalwa ànu menemene mùshindù wùvwa Malàki mwambe nè ùvwa mufwànyine kulwa, kàdi nànsha bàpostòlò kabàakacijingulula? Dìngà ditùkù, mu Maatàayi 11, Yone ùvwa mu bùlokò; nè bàpostòlò, bàmwè bàà ku bayiidi bèndè bàakaya kakonka Yesù ní ùvwa Yèyè awu, anyi—anyi bàvwa nè cyà kwindila mukwàbò.

17 Mpindyewu mònaayi, Yesu kàakamupèèsha mukàndà wà mùshindù wà kuditwàla-...mùshindù wà kuditwàlayè mu bùlokò, anyi mùshindù wà kulombola ngiikàdilù wendè to. Wàkamba nè: “Shààlaayi ànu pabwìpi nè nùtàngile cidi cyènzeka, bwà kuya kaleeja Yone bintu binùdi bamòne byènzeka.” Aci cìvwa ncileeji cyà nè. . . Yèyè nguvwa Dìyi adi.

18 Nènkù mpindyewu vùlukàayi nè, Dìyi dítu misangu yònsò dilwa ànu kùdi mupròfetà. Twètù bònsò tudi bamanyè aci. Nzambi kàtu wènzà cintu nànsha cìmwè kàyì mucileeye bapròfetà Bèndè to. Ke bwà cinyi Mukàndà wà Bwàkabuulwibwà bwà Yesù Kilistò wùdi kaabujimà menemene kàà Kilistò ànu mwaba ewu kumpàlà kwètù, Mukàndà awu. Mpindyewu nebikengelè bwà kutùmaYè umwe kùdi, muntu kampàndà, bwà kushindika Mukàndà awu, kuWùbuulula, kukàngula Bitampì, nè bikwàbò. Kàdi bwà dibuulula dyà Kilistò, ndimana kujingulula ànu Mwab'ewu. Yèyè ùdi kaabujimà kàà Cyôci eci, kàà Dibuuulula. Mpindyewu mònaayi nè, kacýèna cìpangilakù to, kàdi Dìyi dìdi dilwa kùdi mupròfetà.

19 Tàngilàayi Yone mwimàne mu màyi, ùdyànjila kwamba, mupròfetà awu, nè Maasiyà ùvwa ànu dībà adi munkaci mwàbò mene. Yèyè kwamba nè: “Kùdi Kampàndà mwimàne munkaci mwènù mpindyewu, unùdi kanùyì bamanyè to; Yèyè neànùbàtiizè nè Nyumà Mwimpè nè Kapyà.” Mpindyewu vùlukàayi nè, Yèyè ùvwa mwimàne ànu munkaci mwàbò mene, ke mùdi Bible mwàmbè, kàdi bòbò kabàakaCijingulula to. Dìngà ditùkù pàakapwekà Yesù, Yone wàkaMujingulula, è kwambayè nè: “Mònaayi Mwànà wa mùkòòkò wà Nzambi udi umusha mpèkaatù wa bàà pa buloba.” Mpindyewu tàngilàayi, kumpàlà kwà kujinguludiibwaYè kùdi muntu kanà yònsò ewu,

Yêyè wàkalwa kùdì mupròfetà; Yêyè ùvwa Dìyì, Yone nguvwa mupròfetà awu.

20 Ndi mvùluka nè mulongeshi wanyì wa kale wa ba-Baptistes wàkangambila, wamba nè: “Udi mumanyè cyàkenzekà anyi?” Yêyè nè: “Yesù wàkabàtiiza Yone.”

Mémè nè: “Ncyêna ngèèla meeji nàнку to.”

21 Yêyè nè: “Bushùwà’s, kacya Yone kàvwakù mwànji kubàtijiibwa to; yêyè wàkalwa ùyiisha, ùbàtiiza, muntu nànsha umwe kàvwakù mukùmbànyine kumubàtiiza to. Yesù wàkamubàtiiza.”

Mémè nè: “Ncyêna mumanyè to.”

22 Nènkù dīngà ditùkù pāmfwà mu dilonga, Nyumà Mwîmpè kucimbuulwila mùshindù ewu, nwamònu’s. Tàngilàayi, Yêyè wàkapàtuka è kubwela mu màyi; kwambaye nè: “Wêwè udi ulwa kùndi bwà cinyi? Mémè ngudi ukèngela bwà kubatijiibwa kùdì Wêwè.” Yesù wàkamba nè: “Itàbà bwà bìikalè nàнку,” tàngilàayi nè: “kàdi ebu mbutùtàngile twètù (mbutùkùmbànyine) bwà twètù kukùmbaja bwakàne bwònsò.” Yone, mwikàle mupròfetà, mumanyè Dìyì! Mulàmbù wùvwàYe awu, wùvwa nè cyà kusukudiibwa kumpàlà kwà kufidiibwa; díbà adi Yêyè wàkabàtijiibwa, Yone wàkaMubàtiiza, bwalu: “Mbitùkùmbànyine bwà kukùmbaja bwakàne bwònsò.” Dìyì dyàkalwa kùdì mupròfetà, mu màyi.

23 Nè pashìishe pààkabàtijiibwàYe, bantu bàcìvwa ànu... Ke Nyumà Mwîmpè kupwekayè, kî mbantu bònsò bààkaMumòna to. Yone ngwakaMumòna.

24 Mwanjèlò wa Mukalenge mmufwànyine kwikala kaaba aka mene dilòòlò edi, nè pāmfwà muntu umwe ùMumòna, kàdi mukwàbò nànsha umwe.

25 Bukènkè abu, Mùtootò wàkalwà kumutù kwà nzùbu yònsò wa dijoojela awu, mùvwà beena—beena meeji abu bènda bàlonda; nzùbu wa dijoojela nànsha umwe kî mmumanyè cintu nànsha cimwè pa bwalu bwàBù to, muntu mukwàbò nànsha umwe kààkaBùmòna to, nànsha kakesè, ànu beena meeji abu, bwalu bóbò ki bàvwà nè cyà kuBùmòna. BààkaBùmòna. Bùvwa bulelèlè kùdìbò.

26 Bukènkè abu, Dikunji dyà Kapyà adi, pààkatuutàdi Pòlò panshì, mu njila wa ku Damàsèkè, wàkajingulula nè ùvwa mu Bwikadi bwà Nzambi. Mpindyewu, mwena Ebèlù awu kàvwakù mufwànyine kwikala mubiikile nyumà mukwàbò kampàndà nè: “Mukalenge” to, ànu yêyè mwikàle mumanyè nè Aci cìvwa n’Dikunji dyà Kapyà dimwèdimwè dyàkalombolà cisàmbà cyèndè mu cipèèlèlè adi. Wàkamba nè: “Mukalenge, Wêwè udi Nganyi?”

“Shawùlà, Shawùlà, udi uNkèngesha bwà cinyi?” Yêyè nè: “Mémè ndi Yesù.”

27 Yesù wàkamba nè: “Ndi mufùme ku Nzambì, nè Ndi ngààlukila ku Nzambì.” Yèyè ùvwa Kapyà kàvwà mu kaacipuka kàà kàlàkuka kapyà aku, kààkalombolà Mòsà mu cipèèlà, nènku kwalukilaYè ku Cyôci aci.

28 Kàdi mpindyewu’s ke yèyè ewu, mu njila wa ku Damàsèkè, wàkatuuciibwa panshi. Nè bantu bònsò bàvwà nendè, kabààkamònaku Dikunji dyà Kapyà adi to. Nènku Divwa dilelèlà menemene—menemene kùdi Pòlò mu mùshindù wà nè Dyàkamufomija mèsù, nènku byàkakèngela bwà kulombodiibwayè too nè ku mùsèèsù wùvwàbo bàbiikila nè Mululàme awu, mu Damàsèkè. Ùvwa mpofo.

29 Ananiyà, mupròfetà kampàndà kuntwaku, wàkamòna mu cikèènà-kumòna, kuyayè nè kumutentekela byanza nè kwakidilayè Nyumà Mwimpè, nè mabambà kupònawù mu mèsù èndè nènku ùvwa mwà kumòna cyàkàbìdi. Divwa dilelèlà menemene kùdiye mu mùshindù wà nè Dyàkamufomija mèsù, kàdi nànsha umwe wa ku bakwàbò abu kààkajingulula nè Divwakù to, kabàvwà mwà kuDìmòna to.

30 Pa nàнку—pa nàнку ke mùdibi dilòlòlò edi! Kùdi muntu kampàndà musòmbe mwaba awu mene udi mwà kubweja Nzambì mu cyalu, pàvwà bakwàbò kabàyi bamanye kantu nànsha kàmwè pa bwalu abu to. Nwamònu anyi? Kujingulula Nzambì!

31 Nènku Yesù, pàvwàYe pa buloba apa, nè wàkakùmbaja cimanyinu cìvwà Bible mwàmbè nè Neénzè aci, kàdi kabààkacijingulula to bwalu kacìvwà bilondèshile bilèlè byàbò to. Bwà cikondo aci, kabìvwà bikèngela bwà Yèyè kulwa è kwenza cyàkenzà Mòsà to. Bìvwà bikèngela bwà kulwaYè kulediibwa kùdi virgò. Nènku Yèyè, nè bilondèshile Dutèlònòmà 18.15, bìvwà bikèngela kwikalaYè Mupròfetà. Nè ànu menemene Yèyè wàkenza byenzedi abi nè bimanyinu.

32 Beena Yudà bàvwà misangu yònsò ànu bàkèba bimanyinu. Bàvwà balongèshiibwe bwà kabìikadikù beeyèmene miyiiki yà mamanya à mu mitù to; beena Yudà bàvwà bamanyè cìvwà cìmpè kutàmba aci. Beena Ngelikà mbalongshe aci. Kàdi kì mmiyiiki yà mamanya à mu mitù to, kàdi mpa bimanyinu. “Tùleeje cimanyinu.” Bantu aba, umwe kwambayè nè: “Laabì, anyi Mulongeshi, tùleejè cimanyinu.” Bàvwà baswè kumanya. Nè Yèyè ùkaavwa mumanè kubàleeja cimanyinu, nè bàvwà bàjinga cimanyinu cyà mùshindù mushiilàngàne, kàdi Yèyè ùvwa mwà kwenza cimanyinu ànu cyà cikondo aci.

33 Ke mùdiYe kàbìdi wènza leelù ewu, dipòngoloka dyà Nyumà Mwimpè edi ke cimanyinu cyà dimwènèka Dyèndè mu cikondo eci mene, mwàkalayàYe.

34 Bòbò mbaswè cimanyinu, nè Yèyè ùvwa mubàpe cimanyinu cyà mu Mifundu, kàdi bàvwà bàkeba cimanyinu cishiilàngàne.

³⁵ Ke mwaba ngwôwò awu wikalà bantu bààbúngì leelù ewu mwà kupeta cibwejàkàjì. Nudi bamanyè's, Dyambwibwa ndifwànyine kwenzeka, kàdi anjì elàayi ànu meeji mùdibi byènza luse's! Ndekèlaayi ngàalukilè mwaba wùdi Yesù, anyì. . .

³⁶ Yone wàkatùma bayiidi bèndè kuntwaku bwà kumòna Yesù, ní Ûvwa Maasiyà awu anyì to. Dìbà adi, Yèyè wàkenza bintu byàbúngì. Pààkaalukilàye, bayiidi abu, bwà kwambila Yone cìvwàbo bamòne, Yesù wàkambila bóbò bàvwà basòmbe mwaba awu abu, wàmba nè: "Cinùvwà bayè kamòna mu cipèèlè ncinyì? Cinùvwà bàye kamòna ncinyì pàvwà Yone ùyiisha? Nuvwa bayè kamòna muntu mulwàte bilàmbà bitòòke, nè bikwàbò, anyì—anyì cilàmbà cìnefùke anyì?" Yèyè nè: "Abu's ke bàdi. . .mu nzùbù yà màbàlaasà yà bamfùmù. Bàtu bàjiika bafwè, nè bàtwa bàna bàà mu mabòko mishikù, nè bàswika mabàkà à bàna, nè bikwàbò, nànkù. Kí mbamanyè dikwàtà dyà mwelè wà mvità wà nè manza àbìdì to."

³⁷ Yèyè nè: "Nuvwa bapàtùke bwà kuya kamòna cinyì pa dìbà adi, dilèngè didìbo bàkùpa eku nè eku kùdi lupeepèlè kanà lwònsò, muntu kampàndà, musùmbà kampàndà neùmupèeshè mfrangà mitàmbidile nè yèyè neàye ku ewu nùnkù pamutù pàà kulonda dibìikila dyà Mukalenge? Kí n'Yone to! Muntu kampàndà mmufwànyine kumukònyangaja, wàmba nè: 'Netùkupèeshè byàbúngì bu wèwè mwà kuvila *Cikampàndà* nè kwangata *cikampàndà*?' Kí n'Yone to!" Yèyè nè: "Nuvwa bapàtùke bwà kuya kamòna cinyì pa dìbà adi, mupròfetà anyì?" Yèyè nè: "Ndi nnwàmbila nè: 'mutàmbe nè mupròfetà.' Nènkù bu nwènù mwà kucyàkidila, yèyè ewu ke wàkamba mupròfetà nè: 'Mònaayi, Ndi ntuma mùsànjeelà Wanyì kumpàlà Kwànyì, wìkala mwà kulongolola njila.'" Nè mwine awu ùvwa m'Maalàki 3, mwàkambàye nànkù.

³⁸ Dìngà ditùkù bayiidi kuMukonkabò, bàmba nè: "Bwà cinyì Bafùndi bàakamba nè Eliyà ùdi nè cyà kulwa dyàmbedi?" Yesù wàkamba nè: "Ùkaadi mumanè kulwa kàdi nwènù kanùvwa bacimanyè to," nè kuumvwabò nè ùvwa n'Yone Mubàtiji. Bàpostolò basungula abu kabàvwà ànu mwà kumòna nè yèyè ùvwa nganyì to. Ûvwa ng'Eliyà.

³⁹ Mpindyewu tàngilàayi. Nudi bamanyè's, Dilwa dyà—dyà Mukalenge nediikalè dilwa dyà mu musokoko. Wàkamba nè: "Nekwìkalè bàbìdì mu bulààlù, nè Nèngàngatè umwe kàdi kushìya umwe," aci's mmwaba wùdi bu—bufùku. "Bàbìdì mu budimi, Nèngàngatè umwe kàdi kushìya umwe."

⁴⁰ Nudi bamanyè's, kùdi bantu búngì kampànda bàdi bàjìmina ditùkù dyònsò edì, pa buloba apa, bàdi muntu nànsa umwe kàyi mwà kumanya kùdìbo to. Dìmwè dyà ku matùkù àdì panshì aa bìdì mwà kwenzeka bwà bantu bààfwànyina kwamba nè: "Èè, udi uswa kwamba nè dikènga dinène adi, cintu aci cidì pambìdì pèètù mpindyewu anyì? Mwà ngèèla meeji nè bìvwà bikèngela

bwà Èkèleeziyà kuyayè kumpàlà kwà dikènga dinène.” Kabèèna bàmona nè bùmvwà nè Dyambwibwa ndifwànyine kwenzeka kàdi kabàyi bafwànyine kumanya kantu nànsha kàmwè pa bwalu abu to; ndiya dyà mu musokoko dyà Èkèleeziyà.

⁴¹ Nènku, elàayiibi meeji, bantu nebàtungunukè ànu nè kuyiisha, bàmba mùdìbo bìtabuuja nè bàdi munkaci mwà kusungidiibwa, nè kusakidila mu èkèleeziyà, nè kwibaka maèkèleeziyà, nè kutungunuka ànu mwàkenzabo mu matùkù à Noà, nè bikwàbò, kàdi kabàyi bacimanyè to; kàdi Dyambwibwa dimanè kupita: “dikaadi dimanè kwenzeka kàdi nwènù kanùvwà bacimanyè to.” Kùdi nkàmà yà bantu bàdi bàjìmina pa buloba kàdi bantu kabàyi bamanyè bwalu nànsha bùmwe bwà kwàkayàbo to, kabàyi bamanyè kùdìbo to; muntu kampàndà ùvwà ùya mwaba kampàndà, kabàakumvwakù bwalu bwèndè kàbìdi to. Nè aci cidi mwà kwikala Dyambwibwa.

⁴² Ndi nzwàmabila, balundà bàànyì, ànu bwalu tudì bidimba byà èkèleeziyà, anyì cintu kampàndà cyà mùshindù awu, aci kacyèna nè musinga mutàmbe kutùdi to. Mbitàmbe bwimpè bwà wèwè kuswika byà mvità byèbè bimpè. Mbitàmbe bwimpè bwà wèwè kwangata Dîyi dyà Nzambi adi mu kaabujimà nè kushààla mukwàteKù, kàdi kulekela ngenzèlù wà cyena Hollywood udi mwab'ewu ewu. Ncibwele bulùdi nè mu èkèleeziyà, nè mbundù's. Kàdi Hollywood ùdi wèla nsèsà, ùdi ànu wenza bukènkè bwà bùbàlakana, nè èkèleeziyà leelù ewu ùdi ùteeta bwà kudipàlakaja nè Hollywood. Kilistò kèna mu Hollywood to. Kilistò ùdi munda mwà muntu-nkààya. Hollywood ùdi wèla nsèsà anyì. . . Hollywood ùdi ùbàlakana, pàdi Èvànjeeliyò yèyè wèla nsèsà nè didipwekesha. Nzambi kèna mu myaba minène milenga yà yituuta kwisù eyi nè bintu byònsò bitùdi tumòla ebi to. Udi ùlwa mu didipwekesha, mu mmwènekulu wa kalola nè musàngèelu, ùpìcilamù buludi, nènku wèwè mwibidilàngàne nè Dîyi, nèucimòne's.

⁴³ “Ewu udi nè dísù, bwà kuumvwà, ùmvwè cidi Nyumà wàmabila maèkèleeziyà,” nwamònu's, mpindyewu, mpindyewu leelù ewu.

⁴⁴ Cìvwà cimanyishìibwe, Yèyè wàkaDìmanyisha ànu menemene kùdi beena kwitabuuja ditùkù adi, bóbò bàvwà bacindile abu. Tàngilààyi Peetèlò nè Andèlè, tàngilààyi Natànàèlè, kakùyì mpatà mu meeji èndè to, tàngilààyi mukàji wa ku ciinà cyà màyi awu, kakùvwà mpatà to.

⁴⁵ Kàdi Bàfaalèsà aba, ndambù wa matùkù kumpàlà kwà mwaba wùdi cyena-bwalu cyètù dilòòlò edi, bààkaMumòna wènzà cyòci aci, kàdi pashiishe kuMubiikilabò nè “Beelèzèbùlà, démon.” Byenzedi bikaavwa byenjìibwe. Bìvwà bìkèngela bwà kwandamunabò disangisha dyàbò, pa nànu cintu cìmwèpelè cìvwàbo mwà kwenza cìvwà nkucibìikila nè “nyumà mubi.” Beelèzèbùlà ùvwà démon, bu mwena lubùkù anyì cintu

kampàndà. Nè muntu kanà yònsò ewu mmumanyè nè kwenza lubùku nkwa kùdi dyabulù. Nènku bàvwa bàpàlakaja, mwaba wùvwàYe Dìyì òwà dimanyè bwalu busokoka bwà mu mwoyi nè ùdi—nè ùdi ùjaadika nè Yèyè nguvwa Mupròfetà awu uvwa nè cyà kujuudiibwa bwètù mu ditùkù edi awu, Mupròfetà Mupikudi awu; nè pààkenzàYe nànkù, èkèleeziyà mu ditùkù adi kuMwamba mùvwàYe “Beelèzèbùlà.”

⁴⁶ Nudi numòna cìvwàbo anyi? Yèyè kwamba nè: “Nudi mpofo, nulombola mpofo.” Kabààkubwelamù to, anyi kabààkulekela aba bàdi mwìnshì mwàbò abu bàbwela to.

⁴⁷ Citùdi baswè kwenza leelù ewu nkujandula Bulelèlà. Bikèngela tùmanyè Bulelèlà. Yèyè ùdi umwèumwè awu anyi? Yèyè ùdi kaaba aka bwà kuuja cyàkalayàYe bwà kuuja anyi? Kenkètaayi Mifundu nè nùjandulè cìdiYe nè cyà kwenza leelù ewu.

⁴⁸ Ke bwà cinyi John Wesley, anyi, Martin Luther kàvwa mwà kutùngunuka nè mukenji wà Wesley to; bààkacìvwija bulongolodi, ki kwàbò pààbò kwònsò kùvwàbo mwà kuya aku. Pashìishe kulwakù Luther, mupàtùkile mu èkèleeziyà wa Kàtòlikè, ke bóbò kumu. . . Ùvwa muntu wa cimfiikààmundà, kùdibo; kàdi yèyè ùvwa nè mukenji wà dibingishiibwa, bwalu Cìvwa n’Dìyì dyà Nzambi, mulayi. Pashìishe bóbò, paanyimà pàà lufù lwèndè, bààkalongolola bulongolodi bwà Luther. Pashìishe cyàkenzekà ncinyi? Bwàkalwa busopakaja bwònsò cyàkàbìdi.

⁴⁹ Nènku bilondèshile Mifundu kùdi nè cyà kwikala cikwàbò cikondo cyà èkèleeziyà cyàjuukà, nènku, pààkajuukàci, Cikondo cyà Èkèleeziyà wa Filàdèlèfiyà cyàkajuuka, John Wesley. Nènku cyàkenzekà ncyà nè, cyàkatùngunuka nè kulwa citàngila ku wesètè dībà dyònsò. Nènku pààkenzekaci, kùvwa cikondo cyà èkèleeziyà, ke John Wesley kujuukayè, kàdi Luther kàvwa mwà kucyàkidila to bwalu bóbò bàkaavwa bamanè kudìvwija bulongolodi ku dibingishiibwa. Kàvwa mwà kwitaba dijidiibwa to.

⁵⁰ Pashìishe pààkadìvwija beena Wesley bulongolodi mùshindù wàkenzàbo awu, nè mápà makesè kupàtukawù, cyàkenzà, ke kulwakù mukenji wà Mpenta wà dyalujulula dyà mapà; nànsha umwe wa kùdibo kàvwa mwà kunyunga to, bàkaavwa bamanè kudỳenza bulongolodi.

⁵¹ Mpindyewu citùpà cyàci cìdi cyenza luse ncyà nè, beena Mpenta mbatàmbe kudìvwija bulongolodi.

⁵² Tàngilàayi ditùkù ditùdi nè mwoyi edi, cìdi cilayìibwe bwà ditùkù edi. Tudi penyi? Tudi batùngùnùke nè kwenda kubànda. Dikunji dyà Kapyà dìdi dìtentemuka, nè bânà bàà Izalèèlà bàvwa bàtentemuka nè Dikunji dyà Kapyà anyi bààkaalukila mu Èjiipitù. Bikèngela tùtentemukè nè Dìyì.

⁵³ Nènku leelù ewu tudi twenda tushààla beena lulèngù, èkèleeziyà ùdi wènda ùshààla wa maalu à buloba nè kàyi

ùtamba kucyùka myanda to, nè pa nàнку meeji àbò mmatàmbe kukòndakana nè ntèlèviziyò, nè byà nè *Tudi Banangè Susie* nè bimwè byà ku bintu byà kale ebi, nè kushààla kumbèlu. Aci's cidi cileeja mwaba wùdi myoyi yà bantu yìsanganyibwa. Nènku udi mwà kubàmbila nè bintu ebi mbibi, kàdi bàdi bèèla meeji nè wèwè udi mupàle. Ncinyi aci? “Banangi bàà bisànkasanka kutàmba kwikala banangi bàà Nzambi.” Nwamònu anyi?

⁵⁴ Kaa, disànkà ditàmbe bunène dindiku mumanyè, ndyà kwikala kusambila too nè pàndi mwà kumanya nè ndi mu Bwikadi bwà Nzambi, nè kucijingulula. Ndi ngèèla meeji nè aci cìvwa nè cyà kwikala disànkà dyà Èkèleeziyà, m'Bwikadi bwà Nyumà Mwimpè; pa kumòna Nzambi wàkenza mulayi awu mwimàne munkaci mwètù, kumvwa Bwikadi Bwèndè nè kumòna Diyì Dyèndè, nè kuDìmòna dishindikìibwe. Cìvwa nè cyà kufila diitabuuja, kufikisha bikalàbà ku dyènda, mpofo ku dimòna, mpudimaci ku dyumvwa, tumàmà ku dyakula.

⁵⁵ Mwva mwimàne mu Àfrikè wa ku Sud mwàmwa, mùmvwà nè bantu batwè ku binunu nkàmà yìbìdi ku cipalu cyà mbilu cyà Durban, kàdi pààkamònàbo musangu ànu wùmwèpelè aci cyenzèke mùshindù awu, paanyimà pàa mumanè kubùumvwijaci, ànu mu mmwènekèlu mupwekèle; ke kumònabò cintu cìmwèpelè cyà mùshindù awu cyènzeka, cibүүлùdiibwe, nè bantu binunu makùmi àbìdi nè bitaanu kwondopiibwabò dyàkàmwè mu cità nè cità. Kwangatabò màshinyi maleemàlè, à bisemuna bule bwà buumùkile *apa*, à nkàta dikùmi nè yìsambòmbò nè dikùmi nè mwandamukùlù mùshindù awu, kàdi kuwùwuja patapata nè makombo à balèmà nè bikwàbò. Bampàngaanù, bàvwa mene kabàyi bamanyè mwà kusungulujà cyanza cyà balùme nè cyà bakàji to.

⁵⁶ Nènku ditùkù dyàkalondà, Mukalenge Sidney Smith, mulombodi wa cimenga cyà Durban, kumbiikilaye nè kwamba nè: “Nda ku dìdidiishì dyèbè aku, didi ditàngile ku Mbù wa Indien awu, nèumòne cintu kampàndà cyùtù kacya kùyiku mwànji kumòna to.” Kùvwa mulongo wà baampùlushi bènda bàpweka balamè màshinyi manène maleemàlè mwandamutekètè à bisemuna awu, nè nkàmà yà bantu yènda miàtwe mu nyimà, bàvwa ditùkù dishààle mu tulààlù twà babèèdi nè twà dyambwila babèèdi nè byambwidi byàkadibo naabi abi, bènda bimba nè: “Itàbùùjà nàka, bintu byònsò bìdi mwà kwenzeka.” Lumingu lujimà kumpalà, kuntwaku, bàvwa mu mvità muntu nè mukwèndè, mvità yà beena kalaba ayi. Kàdi's ke bóbò abu munkaci mwà kwenda, beelàngàne dibòko ku nshingù, bakwàtàngàne ku cyanza.

⁵⁷ Bwà cinyi? Bààkajingulula nè Nzambi wa mu Dyulu ùvwa mubàmwènekèle mu mmwènekèlu wa Diyì Dyèndè. Twètù beena Àmèrikè bàà mamanya à mu mitù aba tudi basòmbè; nebàjuukè mu Ditùkù dyà Cilumbulwidi nè nebàpiishè lukòngò elu, bwà citùdi bamòne.

⁵⁸ Cidi cìmvùlwija mukàjì kampàndà mu Louisville, mu Kentucky, ànu àbìdì àdì panshì aa, ùvwa nè mwànà mukese wa mu dibòko, wènda ùnyùnguluka mu màkàjiinyi à bintu byà mushinga mupuutula. Nènku ùvwa munkaci mwà kwenza tuntu tukesè, ùteeta bwà kumufikisha ku dimòna, kàdì mwànà mukese wa mu dibòkò awu kutùngunukayè ànu nè kulèèngameena kwà cyanààna. Ke ndekeelu wa byònsò kwambulayè kangonga kakesè, cintu civwà nè cyà kukòka ntèmà yà mwànà mukese wa bunène abu. Nènku kunyùkushayè kangonga aku, kàdì kakwàcìkwètù ànu kacya kààshààla kalèngameena kumpàla. Ke mukàjì awu kubangayè kwela mbilà mikolè, nè kudishìndayè, ke bàmwè bàà ku bantu kulwabò bwà kumwambulwisha. Yèyè nè: “Kaa, to, kabyèna mwà kwenzekakù to! Kabyèna mwà kwenzekakù to!”

Yèyè nè: “Mbwalu kaayi abu?”

Yèyè nè: “Ngàngàbukà mmwàmbè nè mwànà ewu ùkaavwa ùmvwa bîmpè.”

Yèyè nè: “Mbwalu kaayi ebu nè mwànà awu, inàbànzà?”

⁵⁹ Yèyè nè: “Èè, mmupete cikùmà kùkaadi ngondo yisambòmbò, mu mùshindù wà nè ùdì ànu ùsòmba ùshààla nè mèsù mu cibwàshìbwàshì. Nànsha ciikàle cinyi, civwà nè cyà kukòka ntèmà yà mwànà awu, kacyenà mwà kukòka ntèmà yèndè to, nènku yèyè mmushààle ànu kacya wàtàngila mu cibwàshìbwàshì. Pèndè ngàngàbukà mungambìle nè ùvwa wèla meeji nè ùkaavwa ùmvwa bîmpè. Kàdì ndi mulwè nendè mwab’ewu, bwà kwambulakù tuntu twà manayi tùvwà tufwànyine kukòka ntèmà yà mwànà, kàdì kabyèna bìmùkoka ntèmà to. Ùcidi ànu kacya wàsòmba mutàngile mu cibwàshìbwàshì.”

⁶⁰ Mùshindù awu ngùdì èkèleeziyà wènda ùshààla’s! Nzambì mmunyùkùshe mulayi nè mulayi wònsò mu Bible kumpàla kwàbò, tucidi ànu basòmbè nè batàngile mu cibwàshìbwàshì. Batàngile ku cinyi? “Ndeejeku cimanyinu, kî mmwômò?” Pààbì bitùngùnùke ànu dībà dyònsò nè kwenzeka pabwìpì neetù. Cìtwàla Bwikadi bwà Nzambì, civwa nè cyà kwikala citùtòokeshile. Pàdì Nzambì mufile mulayi, Yèyè mmwimàne ku luseke lwà mulayi awu. Èyowà’s, mukalenge.

⁶¹ Paanyimà pàà Yesù mumanè kujaadika cimanyinu Cyèndè cyà Maasiyà menemene, bwà nè Yèyè nguvwa Maasiyà awu, kàdì nè biinè byònsò abi nè: “Tùleejè cimanyinu kampàndà.” Nwamònu’s, bòbò kabààkajingulula to, bàvwa ànu kacya bààshààla batàngile kumpàla kwàbò aku. Kacivwa munda mwàbò bwà kwitabuujabò to.

⁶² “Wèwè,” ànu mùvwà mààmù wanyì mukùlākàjì wa ku sud nè ciibidilu cyà kwamba nè: “kwèna mwà kupeta mashi mu tuunèpà to, bwalu kaènamù nànsha makesè to.”

63 Kabàvwa ànu baMujingùlùle to, bafofòmijìibwe bikolè kùdì twitabàayi yàbò nè—nè—nè bikwàbò, mùvwàbo naabi ditùkù adi. Kabàvwakù bamanyè Mifundu yà mulayi to, bwalu twitabàayi yìvwa micibwikile. Twitabàayi yàbò nè bilèlè byà ditùkù adi bìvwa bibwikile mulayi wà Mifundu. Bu nè bàvwa balongeshiibwe bilondèshìle Mifundu, nè aci cìvwa nè cyà kwikala cimanyinu cìvwa cìlondà Maasiyà!

64 Mbanganyi bàdì biitabuuja nè Yèyè wàkalwa mu cimanyinu Cyèndè cijaalàme? Bushùwà, Yèyè wàkacyèna, Wàkalwa bilondèshìle mulayi. Kàdì bàvwa balongeshiibwe twitabàayi kampàndà nè: “Tudi twitabuuja *cikampàndà*, nè tudi twitabuuja *cikansanga*. Bònsò bwàbò bàdì biitabuuja Nzambi. Bònsò bwàbò . . .”

65 Leelù ewu, twètù beena Àmèrikè, nangàngà, tudi twela meeji nè netwikalè mwà kufwidiibwa luse bwalu tudi twibaka èkèleeziyà minène, nè biikàla nè bampaasàtà bimpè nè bikwàbò. Vùlukaayi nè, byòbì nànkù, Nzambi ùdì nè kànsungàsungà bu Yèyè mwà kutùbwejamù mùshindù awu; bwalu, Kaayinà nè Abèlè, bakuukwidi bàbìdì bàà kumpàlà abu pambèlù pàà Edènà, bààkiibakila Mukalenge cyoshelu, bònsò bàbìdì bààkafila mulàmbù, bònsò bàbìdì bààkalàmbula mapà, bùbìdì bwàbò bààkasambila, kàdì umwe ùvwa wa bushùwà nè mukwàbò ùvwa wa mafi. Mònaayi nè, tudi nè cyà kwikala nè Bulelèlè, nè Bulelèlè n’Dìyì dyà Nzambi, misangu yònsò. Mpindyewu bìdì ànu byà mwomùmwe leelù ewu, bantu bàdì bàtamba kulwa bafofòmijìibwe. Bàdì bàmba . . .

Ndi ngàmba nè: “Udi—udi mwena Kilstò anyì?”

66 “Kaa, mèmè’s ndi wa mu cintu kampàndà.” Nwamònu’s, aci kacyèna naaci bwalu to. Ncyèna nè cìndì mfwila naaci to, kàdì kì ng’aci cìndì nteeta kunwàmbila to. Ikàlà wa mu èkèleeziyà kanà yònsò ùdì muswè awu. Cimwènekèlu cyèbè kacyèna nè cidici cishintulula to.

67 Mwva munkaci mwà kwambila mpaasàtà mu dindà emu. Mu Colorado mwàmwa mvwà nè ciibidilu cyà kukùngwija nyama, nè bikwàbò. Nènku mvwa nè ciibidilu cyà kusòmba kuntwaku, mukòlò wànyì pa cisèbà cyà kusòmbela apu, mùshindù awu. Nè Cisùmbù cyà Troublesome River Hereford cidishila ngombe mu Cibandabanda cyà Troublesome River. Pashiishe nujuukila kuulu kumutù kwà cibandabanda aci, nuya nukatwà ku luseke lwà esètè nè lwà wesètè. Ngombe yònsò yà kumutù *eku*, mu Cisùmbù aci, kuyidiishila ku luseke lwà wesètè; nè—nè musùmbà wùmvwà naawù awu, kuwùdiishila ku luseke lwà esètè. Pashiishe bàvwa nè lupangu kuntwaku bwà kulamina ngombe ku bitùpà byà malaba byà bantu, nè lwà mu mikùnà mwàmwa mu mvwà wà luuyà.

68 Nènku tuvwa mwà kukùngwija ngombe kuntwaku, bimwènenù binaayi anyì bitaanu bishiilàngàne, bimwènenù

mwandamukùlù anyì dikùmi bishìilàngàne, ku musùlù aku, bafwànyìne kukùngwija ngombe yètù mu muvù wà bintu bitòloka, kuya naayi kuntwaku. Nènku mvwa nè ciibidilu cyà kusòmba mwaba awu, mukòlò wànyì dyàmwàmwa dyà lusèngù lwà cisèbà cyà kusòmbela aci, paanyimà pàà twètù bamanè kupeta ngombe yònsò, yònsò yivwa nè cimwènenenu nè bikwàbò byònsò, kuyààluja lwà mu mpàta amu.

⁶⁹ Ke mulami wa diitu awu kwimanayè mwaba awu. Ùvwa munkaci mwà kuyibala pàvwàyi yìpìcilamù apu. Ke mèmè kumòna nè kùvwa bimwènenenu byà mishindù yònsò. Mukalenge Grimes ùvwa nè—nè—nè wà Diamond Bar, nè kumutù kwètù menemene aku bàvwa nè Turkey Track, twètù tuvwa nè Old Tripod, nènku kùvwa bimwènenenu bishìilàngàne bìvwà bipìcila kuntwaku. Kàdì mulami wa—wa diitu awu kàvwa ùtàngila cimwènenenu to. Ùvwa ùtàngila citaata cyà mashi aci mu dici. Kakùvwa cintu nànsha cìmwè mwà kuya mu mpàta amu to, bwà kwepuka disambakana dya mamiinu, bwà ngombe yàbò kushààlayì ànu bilondèshile mamiinu, cintu nànsha cìmwè kacivwa mwà kubwelàmù to pa kuumusha ànu Hereford mulelèlè. Bivwa bikèngela bwà kwikalayì nè cimanyishilu mu dici, ku cimanyinu cyà mashi.

⁷⁰ Mùshindù awu ke wikalàbi ku Cilumbulwidi. Yèyè kààkunkonkakù to nnì mvwa—Méthodiste, Baptiste, Presbytérien. Cimwènenenu cìndì naaci kacýàkwikala nè cìdici cìMwambila to. Kì ncìngà cintu to ng'anu mwena Kilistò mulediibwe cyàkàbidi, mulediibwe ku Mashi à Yesù Kilistò, ke cyàyàmu ncyòci aci. Kakwèna cintu nànsha cìmwè cishààdile ku aci cyàbwelàmù to. Mpindyewu tudi baswè kuvùluka, kuvùluka aci.

⁷¹ Mpindyewu, pàdiYe kàyì mujingulula to, bukolè Bwèndè bùdi misang-. . .kabwèna misangu yònsò bubuulùdiibwe to, pàdiYe kàyì mujingulùdiibwe to. Nànsha Nzambi mwimàne kaaba aka bìshi, bikèngela ùcìtàbùùjè. Kwàjìkì.

⁷² Bu mukàjì uvwa nè mashi àlwa munda awu. Bantu bònsò abu bàpìcila mwaba awu, nè bònsò bwàbò biimàne kuulu, bàmba nè: “Ke Laabi uyààya wàwa. Ke Muntu udi wamba mùdiye Mupròfeta nyèyè awu. Ewu mmukoleshi wa maalu awu,” nè byònsò byà mùshindù awu abi.

⁷³ Kàdì cyàkenzekà ncinyì? Mukàjì mukesè ewu ùvwa nè disaamà dyà mashi àlwa munda, nè ùkaavwa muumvwè bààkula bwà bwalu Bwèndè. Nènku pààkapwekàye kuntwaku, kàyì ùtàngila civwà muntu kanà yònsò ewu mwàmbè to, wàkajingulula nè Yèyè ùvwa Nganyì. Ke yèyè nè: “Bu mèmè ànu mwà kulenga civwàlù Cyèndè!” Nwamònu anyì?

⁷⁴ Nènku pàdì diitabuuja dishùwashùwâlè, mu Nzambi, dilwè cintu cilelèlè kùdiye, dyàkapàtula cinyì? Dyàkapàtula bukolè Bwèndè bwà kumwondopa. KuMulengadi mu mùshindù wà nè,

Yêyè kukùdimuka nè kumwambila cìvwà cimutàcisha, yêyè nè: “Diitabuuja dyèbè dyàkusungìdi.” Cyàkenzà cinyì? Diitabuuja!

⁷⁵ Bakwàbò bàvwà biimàne mwaba awu bàvwà bafwànyine kwikala bàsaama bikolè kumutàmba, kàdi, nudi numòna’s, yêyè wàkajingulula Bwikadi Bwèndè. Kumanyayè nè ùvwà wendè mpùngà.

⁷⁶ Bu twètù ànu mwà kwenza nàнку dilòlò edi, bakwètù’s! Bu twètù ànu mwà kumanya nè Yêyè ùdi ùtùmwènekela mu masangisha aa, bwà kiipàcìlà kàmwèpelè, mbwena kwamba nè, bwà kupàtula majinga ètù atùdi naawù mu Yêyè, bwètù twètù. Kàdi bikèngela tùjingululè Bwikadi Bwèndè. Nènku mpindyewu mmunyi mùdi ùjingulula Bwikadi Bwèndè, mpàdi Dìyì dilaya bwà cikondo *eci* dimwèneshiibwe, kaciyi Dìyì dilaya dyà cikondo cyà Mòsa to, anyi cìmwè cyà ku bikondo bikwàbò abi to, mulayi wà Dìyì bwà cikondo *eci*!

⁷⁷ Mpindyewu tudi tujandula nè Yêyè wàkatùngunuka. Nè Yailò, kakwàcikwètù kakesè kuntwaku nè mwànà wa bakàjì mufwè, yêyè, wàkiitabuuja nè cyàkambàYe aci cìvwà Bulelèlè. Mpindyewu vùlukaàyi nè, yêyè ùvwà mwakwidi, nè ùvwà mukàndikiibwe, bwalu bàvwà bambè nè dīsù dikolè nè: “muntu kanà yònsò uvwa ukadīsanga Nendè awu ùvwà mwà kwipaciibwa mu nsunàngòngà.” Èè, nànsha byòbì nè ùvwà mwediibwe pambèlu anyi kàvwà mwediibwe pambèlu to, ùvwà musànkishiibwe nè Nzambi ùvwà wikalangana mu Kilistò, nènku aci cìvwà n’Dìyì. Nènku cyàkenzàci ncinyì? Cyàkamupàtwila bukolè bwà dibìikà dyà ku lufù bùvwà munda Mwèndè abu; amen, kwalujayè mwànà wa bakàjì uvwa mufwè, nè mulàadika awu, bwalu wàkajingulula nè Nzambi ùvwà munda mwà Kilistò, nè Bwikadi Bwèndè bùvwà mu nzùbu mwèndè.

⁷⁸ Kàdi mu cimenga mwàkakolelèYe amu, bukolè bùmwebùmwe abu bùvwà munda Mwèndè, mu cimenga mwàkakolelèYe amu, kàdi kabààkaMujingululakù to. Bwikadi Bwèndè, bwàbò bôbò, kabùvwà bùbàmbila bwalu to; pàmwàpa mukoleshi kampàndà wa maalu. “Bintu ebi bìdi penyi? Bàdi bàngambila nè Wèwè udi wenza *cikampàndà*. Byènzaaku Wèwè apa mmonè’s.”

⁷⁹ Kanùtukù bumvwè aci anyi? “Piikalàku...Nwènù musumbà wa beena mpenta aba, nè nwènù, bàdi, nwitabuuja dyondopa dyà kùdi Nzambi abu? Ke *kampàndà* nyêyè ewu lwà apa, ànjì mwondopebì mmòne’s.”

⁸⁰ Awu’s ndyabùlù umwèumwè wa kale awu, wakamba nè: “Wèwè ní udi Mwànà wa Nzambi, tùmìnàbi mabwe aa dìyì bwà àndamukè mampà.”

⁸¹ Dyabùlù umwèumwè wa kale awu, pàvwàYe nè mèsù Èndè mabwikila apu, bààkaMutuuta mucì ku mutù, kàdi kwamba nè: “Mpindyewu,” bàsambulujilangana mucì kùdi ewu nè

mukwàbò, kàdi bàmba nè: “twámblèbi tǔng wàKutuutù awu nganyì, nènku netùKwitàbùùjè Wèwè ní udi Mupròfetà.” Kacya kàtu mwenzè nànkù to. Kàtu wènzela muntu nànsha umwe bikàsà to. Èyowà.

⁸² Umwèumwè awu, pàvwàYe pa nkùrusè apu, wàkamba nè: “Wèwè ní udi Mwànà wa Nzambi, tuuluka ku nkùrusè bwà kujaadika nè Wèwè udi Mwànà wa Nzambi.” Yèyè’s ùvwa mwà kwikala mucyènzè.

⁸³ BààkaMwela kààlumbandi kàà katàmbe bunène kàvwàYekù mupetè, mwab’awu, kàdi kabàvwa bacimanyè to. Kwambabò nè: “Wàkasùngila bakwàbò; kàdi Kèna mwà kuDisùngila to.” Bu nè Ùvwa mufwànyine kuDisùngila, Kàvwa mwà kwikala musùngile bakwàbò to. WàkaDifila Yèyè mwinè bwà kumònaYe mwà kusùngila bakwàbò. Nwamònu’s, kabààkajingulula Bwikadi bwà Nzambi to. Kwàjikì.

⁸⁴ Mpindyewu kupàtulaci bukolè bwà kwondopa, nè cinyì? Necipatulè bukolè bwà kutàbeeja mèsù bwà kuMujingulula, anyì kufofomija mèsù èbè mu mùshindù wà kùyikù mwà kuMujingulula to. Cidi citàbeeja mèsù à umwe, cidi cikànga mèsù à mwena bupidyà.

⁸⁵ Kàdi, cimenga aci, kabàvwa nè dyeyemena mu Yèyè to. Ku nzùbu wa Mùfaalèsà aku, wàkaMubiikidisha; kwà Simonà, Mùfaalèsà, nènku ùvwa mwenzè didyà dinène dyà dilòòlò, nè Mùfaalèsà ùvwa muswè kubàjaadikila nè Yèyè kàvwa Mupròfetà to. Pa nànkù ùvwa lwà paanyimà apu ùtucishangana ngalaasa yèndè ayi nè màkòpo, nè mànànanshì malenga awu mu nzùbu.

⁸⁶ Kàdi Yesù ùvwa mubwele mupicile pàvwà mwoweshanganyi wa màyi ku makàsà awu, kàdi kusòmbayè panshì mwaba awu. Nènku, manyaanù, nè mupùùyà mubi wà—wà mu budimi pambidi Pèndè, mùvwà nyama yìsanganyibwa mu kajila amu, nè bivwàlù Byèndè. Ke bwà cinyì bàvwa bòweshangana màyi ku makàsà mu matùkù awu.

⁸⁷ Nènku, nudi numòna’s, cintu cyà kumpàlà, paùdi ubiikidiibwa ku—ku nzùbu kampàndà mu Pàlèstinà mwàmwa, pàvwàbò bàvwàla sàndalà ayi apu, cintu cyà kumpàlà cìvwàbo bènza cìvwa nkukwowesha màyi ku makàsà, nè pashìishe kukupèesha cintu kampàndà; bwà kwendela pa tàpì yàbò, tàpì minène yà beena Peelààsà nè bikwàbò, yìvwa milenga kumòna.

⁸⁸ Cintu cidi cìlonda cìvwàbo bènza, bàdi pashìisha bàkupèesha ndambù wa màfutà mu cyanza. Mmapàtùkile mu kaacimuma kakesè kàà pomme kàdi kasanganyibwa lwà ku mukùnà kwàka, cimuma cyà pomme cyà rose. Paanyimà pàà cìlòngò cyà rose cimanè kuya, cidi cìshiya cimuma cyà pomme nè mànànanshì malenga awu. Nè bôbò—bôbò bàdi bàbilaaba kwìsù. Nè nsèsè yà buludi yà dībà dyà cyena Pàlèstinà ayi mmibì be, nènku, nudi numòna’s, aci cidi cyumba cìfuka mupùùyà. Nè—nè dībà adi paùdi wenza nànkù, dībà adi mwena difestò

ùdi ùlwa ku ciibi nè ùbàtwa mishiku ku nshìngù nè ùbàjingila difika dilenga.

⁸⁹ Mmunyi mùvwà beena mudimu abu balekèle Yesù mupite mwaba awu, kabàyi baMwowèshe màyi ku makàsà anyi—anyi—anyi baMupèèsha maanyi bwà kuDilaabawù, anyi mene kuMutwà mishikù yà diMujingila difika dilenga?

⁹⁰ Kàdi kùvwà ndumbà mukesè mu mùsèèsù amu. Beena ntèndeleeleu bônso abu mpindyewu, musumbà mujimà awu kabààkaMujingulula to. Kàdi mukàji mukesè wa luumù lubi, wàkatàngidila, pàmwàpa mu ciibi, nè kuMumònayè musòmbe mwenze bu muntu mutèèka kumpenga.

⁹¹ Mùshindù awu ke wùdiYe leelù ewu munkaci mwà musumbà wà ntèndeleeleu kàbidì, muntu mutèèka kumpenga, kàyi mwakidila bìmpè to, kàyi mujinga to. “Bukooya, manyaanu, munsantu mubunguluki wa mu malaba,” mùdìbò bàCibiikila, “muntu wa—wa mùshindù kampàndà udi kàyi nè meeji èndè mu ôwò to; mwena lubùkù, lubùkù,” anyi dìnà kampàndà dibi.

⁹² Nènku Yesù, nènkaifikèku mu tusunsa tukesè emu, wàkamba nè: “Akùlà díyi dibi bwà Mwànà wa muntu, nebànùfwidilèci luse; kàdi pààlwà Nyumà Mwîmpè bwà kwenza cintu cìmwècìmwè aci, díyi dìmwèpelè kadyàkunùfwidiibwakù luse to.” Nwamònu anyi?

⁹³ Kàdi mwaba awu mukàji mukesè awu kumònayè nè Yèyè ùvwà nè dijinga dyà kumukwàcila mudimu. Kàdi kubwelayèmu nè lubilu lwònsò, kuyayè nè kupeta mùlàngì mùle wà maanyi à alabaster. Pàmwàpa muwùpetè nè mfrangà yà ku bundumbà bwèndè abu. Kàdi ciwva ncinyi? Ùvwà mufwànyine kwikala mwelè meeji nè: “Yèyè ùdi—Yèyè ùdi Mupròfetà. Kàdi ndi mvùluka mukwàbò mukàji mu ngiikàdilù wanyi, muntu mukwàbò bu mèmè kùnu; wàkapeta mpungà nè yèyè wàkaMujingulula, nè wàkafwidiiibwa luse.” Lwà ku ciinà cyà màyi cyà Suukà kwàka, makèlèlèlè dilòòlò awu tuvwa baciyyiikile. “Nènku bu mèmè ànu mwà kufika kùdiYe, ndi mumanyè nè Yèyè ùdi Nganyi, nèmMukwàcile mudimu. Bakwàbò bàà ku bòbò, ncyèna ncyuka cidibo bènzà to. Mèmè nèmMukwàcile mudimu. Nènjingululè nè Yèyè m’Mwànà wa Nzambi.”

⁹⁴ Kubwelayè lubilu. Kuseemenayè pabwîpi Nendè menemene, ke kudyùmvwayè mupîile bikolè. Mùshindù awu ke wùdi ngènzàmpèkààtù mulelèlè udi unyingalala ùdyùmvwà mu Bwikadi Bwèndè, mupîile’s!

⁹⁵ Ke binsònji kubanga kumata, kàdi ùvwà ùteeta kubisokoka. Kumatabi pa makàsà Èndè. Ùvwà nè cyà kuMulaaba maanyi, kàdi binsònji bìMumacila pa makàsà. Ke kubangayè kubikùpula, nè—nè kwasa mwadi, nè—nè kubikùpula nè byanza byèndè. Nè—nè makàsà Èndè kushàalawù masopàkàne nè manyaanu àvwàpu awu; nènku—nènku wèwè muswè bulelèlè

kuciitabuuja, nè dikaci dyà nyama dyà mu kajila aku, muntu nè muntu ùvwa wèndela ànu mu kajila kàmwèkàmwè aku. Nènku's ke cyôci aci, dikaci adi pambidi Pèndè, musòmbe mwaba awu, nè binsònji byèndè bìvwa bìmacila pa makàsà Èndè, nè ùvwa ùteeta bwà kuàkùpula. Kàdi kàvwa nè èsumè to.

⁹⁶ Luumù nè bulenga byà mukàji ncinyi? Nsuki yèndè. Ke bwà cinyi bààbùngi bàà ku nwénù bakàji leelù ewu bàdi bàyikòsa yònsò. Aci ncibi. Yèyè—yèyè kwangata nsuki yèndè nè kutwàdija kwowesha màyi ku... Makàsà Èndè, nè kuàkùpula, nè nsuki yèndè—yèndè milenga ayi, ùmusha dikaci adi pambidi Pèndè, ùditèeka pa yèyè mwine, wàmbula bundù Bwèndè. Kaa, ekèlekè! Ke paùdi ùjingulula nè Nganyi udi mu bwikadi bwèbè. Nwamònu anyi? Bàna bèètù bàà bakàji mbafwànyine kwamba kwimanyina pa mitù yàbò, bwà kwikala nè nsuki búngi bukùmbàne bwà kwenza nàнку. Pa nàнку ke yèyè awu wòwesha makàsà Èndè màyi, nè ùàkùpula nè nsuki yèndè, yèyè kutwà makàsà Èndè mishiku.

⁹⁷ Ke mukùlumpe Simonà awu mwimàne paanyimà apu, kwambayè nè: “Huh! Huh!” Kaa, ndi ànu mwà kumumòna ùtaayika. Kààkajingulula nè Yèyè ùvwa Nganyi to. Yèyè nè: “S'mvwa munwàmbile nè Kàvwa Mupròfètà to. Bu nè Yèyè ùvwa Mupròfètà, Ùvwa mufwànyine kujingulula nè mmukàji wa mùshindù kaayi udi pabwìpi Nèndè awu.”

⁹⁸ Yesù kààkanyungishakù dikàsà to. Ùvwa ànu mumutàngile cyanààna. Ke kukwàcikayè bwôwà.

⁹⁹ Pashìishe paanyimà pàà Yèyè mumanè kujikija, mukàji awu muMwenzèle mudimu, Wàkatàngila, kwamba nè: “Simonà, ndi nè cintu kampàndà cyà kukwambila. Uvwa muMbìikìdishe mwab'ewu. Udi muNtwàle mwab'ewu,” mu ngaakwilù mukwàbò, nè kabwe mu lukonyi. “Uvwa muswè kuNtwishisha. Uvwa muswè kujaadika nè Mémè ncìvwa cìNdì to. Kàdi wèwè, paùvwà muNtwàle mwab'ewu, s'uvwa nè cyà kwikala muNgowèshe màyi ku makàsà, kàdi kwèna mucyènze nànsa. Uvwa nè cyà kwikala muMpèeshe maanyi bwà kulaaba mutù Wànyì, kàdi kwèna mucyènze to. Kwènakù muNtwè mishikù yà difika dilenga to. Nènku mukàji ewu, kacya ànu ngàfika kaaba aka, mmwowèshe makàsà Àanyì nè binsònji byèndè, nè muàkùpùle nè—nè nsuki yèndè, nè dībà dyònsò mmutwè màakàsà Àanyì mishiku kacya ngìkala kaaba aka. Ndi neebè bwalu kampàndà, Simonà.”

¹⁰⁰ Pashìishe kukùdimukaYè kùdì mukàji awu. Ndi ànu mwà kudifwànyikijila mmumòna mwimàne mwaba awu, nè mèsù èndè malenga manène awu makùnze cidìdìl, nè kwìsù kwèndè, nè mwaba wùvwàye nè màfutà nè—nè lupwishi lwà mu njila, kwìsù kwèndè. Kàdi yèyè ùdi wèla meeji nè: “Mpindyewu ndi mwenzè bibi anyi? Ndi mwenzè bibi anyi?”

101 Yèyè nè: “Nènku ndi ngàmbila mukàjì ewu, nè ‘mpèkaatù yèndè yìdì yàbûngì ayi, mmifwidiibwe yònsò luse. Ndàaku mu ditalala.”

102 Cìvwa ncinyi aci? Mukàjì wàkajingulula. Wàkajingulula mpùngà wèndè. Nwamònu anyi? Wàkenza nànkù. WàkaMwenzela mudimu. Bàfaalèsà kabàakacyènza to. Wàkacimòna nè wàkajingulula Bwikadi Bwèndè, kàdi cyàkenza cinyi? Byàkwowesha. Cyàkamupàtwila cinyi? Difwidiibwa dyà luse. Cyàkamupàtwila, difwidiibwa dyà luse ku mpèkaatù yèndè. Cyàkenza kàbìdì cinyi? Cyàkapàtula kàbìdì bukolè bwà Nzambi, bwà kuleeja beena bupidyà abu nè Yèyè ùvwa Muprofetà. Ùvwa mumanyè nè yèyè ùvwa nganyi. Cyàkapàtula kàbìdì disànka nè bukolè nè Mwoyi wà Cyendèlèlè. Cyàkapàtula aci.

103 Kàdi ewu wàkenza nè bàbwejè mùsonso munène wà katankù mu makàsà à musinga awu, yèyè kàakajingululakù Bwikadi bwà Nzambi munda Mwèndè to. Ùvwa kàbìdì muswè bwà Yèyè kumwenzelakù kaadiyelè kampàndà, dicyònkomoaka kampàndà.

104 Ke cìdì bàà pa buloba baswè, leelù ewu, mmusùmbà wà dicyònkomojangana. Kì mmuswè Èvànjeeliyò to. Mbaswè kucyònkomojiibwa.

105 Ke Pilaatù kwambayè nè: “Ndi muswè kujinga cishimà kampàndà cyà kùdiYe, anyi cintu kampàndà cyà mùshindù awu. Lwâyì Nèndè mwab’ewu.” Ànu mu Bwikadi bwà Nzambi mene amu, kàdi kuBùdyombola, bwà (cinyi?) bwalu yèyè wàkanyisha mmwènenù wa—wa bantu bònsò kutàmba mwàkanyishàye bwà kwikala nè mpùngà wa kwikala mu Bwikadi bwà Nzambi. Cyàkenzekà ncinyi? Mukàjì awu wàkafwidiibwa luse, nè kupèèshiiibwayè Mwoyi wà Cyendèlèlè; kàdi mulùme awu wàkajimija meeji èndè nè kutombokayè, nè kudishipayè mu kudiina yèyè mwine mu mâyi mu Suisse mwàmwa.

106 Mpindyewu, tàngilàayi, wàkatàmba kuya kule nè mmwènenù wa mwasàkànaayi wa ditukù adi, nè: “Yèyè ùvwa Beelèzèbùlà; Yèyè ùvwa ànu mwena kwitabuuja wa budingibudingi; kakùvwa cyà bushùwà cintu nànsha cìmwè kùdiYe to,” yèyè, cyàkenzàye ncinyi? Yèyè wàkalekela, wàkalekela mpùngà wèndè, mu Bwikadi bwà Nzambi, yèyè’s ùvwa mwà kwikala mufwidiibwe luse. Kwambayè nè: “Ndi nè bukòokeshi bwà kuKupoopela pa nkùrusè. Ndi nè bukòokeshi bwà kuKulekela.”

107 Yèyè nè: “Kwèna nè bukòokeshi nànsha bùmwe to pàdibu kabüyì bufùmè kùdi Taatù Wanyi.” Bìvwa bìkèngela kwikalayè mumanyè, bu yèyè mumanyè Mifundu. Nè yèyè, bu mwena Yuda, bìvwa bìkèngela kwikalayè mumanyè cyòci aci. Kàdi, nudi numòna’s, bilèlè byèndè bìvwa bimulongeshe bibi. Mùshindù awu ke wùdibi leelù ewu. Wikalapù nànsha mulongèshiiibwe mu mùshindù mujaalàme’s wè! Bu muntu awu wikala mufwànyine

kwikala mwitabùùje cìvwà Mifundu myambe's wè! Kàdi bilèlè byèndè bívwa bimuumùshekù.

¹⁰⁸ Byà mwomùmwe nè mùdìbi leelù ewu. Bantu nebàngatè Èvànjeeliyò mulelèlè, mwaba wùdi Nyumà Mwîmpè ùbwela awu, nènku bukolè nè butùmbi bwà Nzambi búsùngila bangènzàmpèkààtù ku mpèkaatù nè bùbàvwija badishikàmine, nè bùbàbàtiiza mu Nyumà Mwîmpè, nè bwòndopa babèèdi, nè bùleeja bimanyinu nè maalù à kukèma, kàdi bantu nebàye kule, bàmba nè: "Aa! Mpindyewu nudi bamanyè cidi èkèleeziyà wanyì wìtabuuja anyi? 'Aci's ndukutukutu!'" Nwamònu's, udi munkaci mwà kujimija; udi munkaci mwà kupàànyisha makenji èbè à bwanààbutè. Esawù mukwàbò's!

¹⁰⁹ Bààbùngì menemene bàdi bàpeta mpùngà wumwèwumwè awu leelù ewu, bwà kwimana mu Bwikadi Bwèndè mwàkenzàbo musangu awu amu. Kàdi nànsha nànkù, bwà mmwènenù wa masàkànaayi, bàdi bàMubènga. Biimàne mu Bwikadi bwà Nzambi's! Ndi ndikonka, mulundà wanyì, dilòlòlò edi, twètù bantu bàdi beena Kilistò, mu Bwikadi Bwèndè, nè biikàle tusaama, ní katwenà tubènga mpùngà wa kwondopiibwa ànu ku diMwìtabuuja cyanààna anyi? Twètù bàdi bàmba mutùdi baMwìtabùùje abu, katwèna bulelèlè tujingulula Bwikadi Bwèndè, cidiYe mulayè bwà kwenza leelù ewu to.

¹¹⁰ Mushindikìibwe kùdi mulayì bwà ditùkù adi, Yesù ùvwa munkaci mwà kutàndisha lukòngò alu bwà kubènga kwìtabuuja cimanyinu Cyèndè cyà Maasiyà aci. Tudi tucimòna kaaba aka, Ùvwa ùbàtandisha. BàMubiikila nè m'Beelèzèbulà! Bàvwa baswè bwà Yèyè kwenza cimanyinu cyà Mòsa, pàmwàpa, kukàngula Mbù Mukünze. Bàvwa baswè bwà Yèyè kwenza cimanyinu cyà Davìdi, kwangata nkwasà wa butùmbi nè bukalenge. Kàdi kakùvwa Mufundu nànsha wùmwe mwàmbè nè Yèyè ùvwa mufwànyine kwenza nànkù to. Ùvwa nè cyà kwikala Mupròfetà. Yèyè ùlwalwa, Mfùmù awu. Bívwa bikèngela kwikalaYè Mupròfetà dìbà adi, nè Wakenza cimanyinu cìvwà Nzambi mwàmbè nè Neènzè mu matùkù awu aci, kàdi bóbò bəcìvwa ànu baswè bwà Yèyè kwenza cimanyinu kampàndà cìvwà cìbàsànkisha. Nwamònu anyi?

¹¹¹ Kàdi ndi ànu ndikonka ní katwèna ànu bindile cintu kampàndà kumpalà kule kwàka pààci ciikàle ku luseke lwètù. Ndi ndikonka ní mbifwànyèkù kwikala mùshindù wùmwe wùmwe awu, ní tudi mwà kupìcila kumpengà kwà wetù mpùngà? Vùlukààyi nè, bu bimfwànyì byà kale, bimfwànyì kabyèna mwà kunyangukakù to. Cimanyinu cyà ndekeelu, bilondèshile Yesù, Yèyè wàkamba nè: "Ànu mwàkadìbi mu matùkù à Sodoma, ke mwìkalàbi mu matùkù awu pìikalà Mwàna wa muntu," kí m'Mwàna wa Nzambi mpindyewu to, "pìikalà Mwàna wa muntu munkaci mwà kubuuludiibwa." Tàngilàayi mwab'ewu mùdìbi bitèèkiibwa leelù ewu's! Balundà

bàanyi, ndi mwà kunwàmbila bintu kampàndà mwab'ewu bîndi nciyi nè cyà kunwàmbila to, kàdi mbifwànyine kunùshitula.

112 Ndi muswè kunwèlakù lukonko lukesè patùdì twimanyika apa, kumpàlà kwà twètù kutungunuka nè disangisha edi, ànu tusunsa tukesè cyanàànà. Ndi ndikonka ní ndi mwà kunukonka eci.

113 Muntu kanà yònsò ewu mmumanyè nè buloba, bilondèshile myaba, byònsò mbitèèka mu bulongàme bwà Dilwa Dyèndè. “Dikanka dyà buloba mu myaba mishilèshilàngàne; ngondo munkaci mwà kupatula mashi makünzè, anyi mudilu mukünze wà volcan, mumujingile,” bu mwàkambà Yesù nè indilaayi cimanyinu aci mu matùkù à ndekeelu; “mbù ùkungula, myoyi yà bantu yamba kwimana bwà bwòwà, nè dipampakana dyà cikondo, dikènga munkaci mwà matunga.”

114 Tàngilàayi mùdì dinyangakaja dyà maalu mu nkwaka leelù ewu! Citàngilaayi leelù ewu, babàkyanganyi bàà balùme nè balùme mbàvulangana mu Californie, nè byà pa lukàmà makùmi ànaayi, majinga à mu bufùki àkaadi mamanè kujìmina.

115 Tàngilàayi ku . . . Tàngilàayi leelù ewu, mwikalà bantu mwà kushààla kumbèlu, bàdi bàdibìikila mùdìbo beena Kilistò abu, nè kutèeleja bantu bu mùdì Pat Boone, Elvis Presley, Ernie Ford, nè aba bàtù bìmba misambu mu dyàlumingu abu; nè kutàngila bintu abi, bàdi bàbàtàngila bàtwa bakàjì mishiku, nè bikwàbò kuntwaku.

116 Pàdìbi nè, muntu nànsha umwe kàvwa nè cyà kutwà mukàjì mishiku pàdiye kàyì mwànji kumusèla to. Ntujílu twà bulùme nè bukàjì túsambakana. Nànsha cyòci mwaba kanà wònsò ùdici mwà kwikala awu, mbibi. Ncyenzi cyà mu mùshindù mushààdile cyà disangila dyà mulùme nè mukàjì. Pàdì tujílu twà bulùme nè bukàjì tulengangana, ncyenzi cyà disangila dyà mulùme nè mukàjì. Nènku ncyenza . . . Mulùme ùtwa mulùme nendè mishikù mu mishikù, bìdi mwà kumulùkisha, anyi mukàjì nè mukàjì nendè. Mbishilàngàne bwà cinyi? Cìdì—cìdì ncyenzi cyà disangila dyà mulùme nè mukàjì, mu mùshindù mushààdile. Ncyà bushùwà. Cifwànyikijilu cyà Kilistò ùtwa Mukàj'Èndè-musèla mishiku, nwamònu's. Kabìvwa bikèngela bwà wèwè kwenza nànkù nànsha.

117 Kàdi citàngilaayi leelù ewu, sèndèmà yònsò eyi nè bikwàbò, nè mushiki munène wà ditwàngana dyà mishiku nè dyupukilangana. Nènku kakùyì mpatà to cìdì ànu bu masandi à pa bütòkà, myaba yònsò, kàdi bantu mbampofò bikolè mu mùshindù wà kabàyi bàcimòna to. Cyà bushùwà! Byònsò bìdi mu ngiikàdilù wa Sodomà, cyena Sodomà myaba yònsò, mùdì Bible mwàmbe.

118 Bintu byàbùngì be, tàngilàayi mu matùkù aa, byàkambàYe nè nebyènzekè! Tàngilàayi milayi yàkafilàYe ayi, yìvwa mwà kwenzeka ditùkù edi. Nè pashishe cikenkètaayi, cìdì munkaci

mwà kwenzeka, nè nùmonè mwaba wutùdì, dîbà adi nudi numòna nè Yèyè ùcidi ànu mu Dìyì Dyèndè anyì to.

¹¹⁹ Bàvwa baswè kumòna cimanyinu cyà Mòsà, cimanyinu cyà Davidì. Aci kacivwa bwà cikondo cyàbò to; cìvwa cilayìibwe bwà cikondo cyà Mòsà nè cikondo aci. Mulaýì wà cikondo eci wùdì nè cyà kwenzeka. Yèyè ùkaavwa mubàleeje patòòke, Yèyè, ku Mifùndu, nè mubabiikile bwà kukenketa Mifùndu, bwà kumòna nè mmu ditùkù kaayì mùvwàbo nè mwoyi.

¹²⁰ Ûdi munkaci mwà kwenza cintu cìmwècìmwè aci mpindyewu mene's! Kenkètaayi Mifùndu, nwènù bàdì biitabuuja Bible abu. Ncinyi cidi nè cyà kwenzeka kaaba aka mene kumpalà kwà Dilwa Dyèndè?

¹²¹ Tàngilàayi bàà pa buloba, mu ngiimànyìnù awu; mpindyewu, abu's mbàà pa buloba. Tàngilàayi èkèleeziyà, mwaba wùdiye ùsanganyibwa. Tàngilàayi mwaba wùdiye ùsanganyibwa nè: "munkaci mwà kunyanguka, wa civùmvù, Laòdikiyà, wèla Dìyì pambèlu." Cintu cyònsò mu kaabujimà cidi cikabwela mu nsangilu munène wa maèkèleeziyà, Nsangilu wa Maèkèleeziyà wa Buloba bujimà, bènza cimanyinu cyà nyama wa lwonji; cidi Bible wàmba patòòke nè ncibi, nè bintu byònsò abi, kàdì nànsha nànkù beena Mishòònyì bàdì munkaci mwà kubwelamù, mutù mwinyika, kabàyi bamanyè Mifùndu to. Bilèlè byàbò! Kaa, bàdì bàkèba mu—mu—mu—muntu wa bukolè, nènku bàdì nè cyà kupeta umwe. Nebàtwishiibwè bwa kucipeta.

¹²² Ûvwa nè, tàngilàayi, kàdì Yesù ùvwa muDìleejè ànu menemene nè Yèyè ùvwa Nganyì, nè mubàjaadikile nè Yèyè ùvwa Nganyì, mu cikondo Cyèndè.

¹²³ Nènku ncintu cìmwècìmwè aci leelù ewu's! Mpindyewu tàngilàayi, twàngatàayi mùdì maalu matèèkiibwe mu Luukà 17: "Ànu mwàkadibi mu matùkù à Sodomà." Tàngilàayi bàà pa buloba, tàngilàayi èkèleeziyà, ngiikàdilù wa cyena Sodomà! Tàngilàayi mwaba wùvwà Lotà ùsanganyibwa; pàvwà bantu abu bateeta mene bwà—bateetè bwà kusàkila ciibi kubwela, kùvwà banjèlò aba, bantu aba.

¹²⁴ Mònaayi, tàngilàayi kunweku. Kùdì nè...Tàngilàayi, Abraham ùvwa pa mukùnà apu. Kàvwa mu Sodomà to. Aci's ncifwànyikijilu.

¹²⁵ Kùtu misangu yònsò ànu bitùpà bisàtù byà bantu mu didìsangisha dyà butèndeledi: beena kwitabuuja, beena kwitabuuja bàà budìngibudìngì, nè beena bupidyà. Misangu yònsò ànu bisàtù abi! Nènku's ki bòbò abu, kiùdì beena bupidyà bàà cyena Sodomà; mwena kwitabuuja wa budìngibudìngì Lotà; nè Abraham, Èkèleeziyà musungula.

¹²⁶ Mpindyewu, tàngilàayi baamisànjeelà bààbò mu ditùkù adi. Baamisànjeelà bàbìdì bààkapweka è kuyiishabò Sodomà.

Bôbò kabààkenza bishimà to, bàvwa ànu babàtuutè nè bufofo. Diyiisha dyà Diyi ditu dyenza nànkù.

¹²⁷ Kàdi tàngilàayi nùmonè nè ncishimà cyà mùshindù kaayi cyàkenza Mwanjèlò ewu wakashààla nè Abraham awu. Ùvwa muMukomè nyimà's. Nè wàkambila Abraham nè dìnà dyèndè òvwa dishintùlùdiibwè; kumubiikila nè "Abraham" pamutù pàà Abram. Kàvwa mwà kupeta mwànà awu to too nè pàakashintuludiibwa dìnà dyèndè, anyi Sarah. Wàkabàmbila cìvwa dìnà dyàbò. Mwanjèlò wàkabàmbila nànkù. Nè Yèyè wàkamba nè Ùvwa nè cyà kumwènekela Sarah bilondèshile cikondo cyà mwoyi.

¹²⁸ Kàdi Sarah kucisekayè. Kàdi pàakasekà Sarah...Muntu ùvwa nè nyimà Wendè awu mukoma, Muntu awu ùdya munyiinyi wà kànà kàà ngombe, nè ùnwa mabèèlè à ngombe, nè ùdya dyàmpà; Muntu, nè lupwishi ku bilàmbà Byèndè, mwena Iwendu, ùvwa Nzambi Yèyè mwinè. Nè Abraham wàkacìjingulula bwalu Yèyè ùvwa mumanyè meeji àvwa mu mwoyi wà Sarah paanyimà Pèndè apu. Yèyè nè: "Bwà cinyi Sarah wàmbi munda mwèndè nè: 'Mmunyi mùdi bintu ebi mwà kwikala?' Kùdiku cintu kampàndà cìkolèlè Nzambi anyi?" Nwamònu anyi? Ke Sarah kupàtuka nè kucivilayè. Kwambayè nè: "Èyowa, kàdi's wambi." Mpindyewu, nunku Yèyè's mmwangàte mwoyi wà Sarah ànu mwaba awu, bwà dibèngà dyèndè dyà kwitabuuja, kàdi, nwamònu's, yèyè ùdi citùpà cyà Abraham.

¹²⁹ Nè bupidyà bwètù mu dimwèneshiibwa Dyèndè dinène mu dîbà edi; tudi citùpà cyà Kilistò. Yèyè ùdi ànu, nwamònu's, tudi—tudi, nwamònu's, wetù...Bikèngela bwà Yèyè—Yèyè àcìlamè.

¹³⁰ Mpindyewu, mònaayi nè, kacya kakùtukù kwànji kwikala cikondo mu maalu-malonda à cikondo cyà èkèleeziyà...Nè ndi mumanyè mulongi mulelèlè umwèpelè ùndi nyiikila nendè, mulongi wa maalu-malonda. Kacya kakùtukù kwànji kwikala to. Ndi mufwànyine kulòmba mulongi kànà yònsò wa Bible bwà kungambilakù muntu umwèpelè ukààdikù mutùmiiibwe kùdi cikondo cyà èkèleeziyà, mu èkèleeziyà ewu kacya ànu ku dipoopediibwa dyà pa nkùrusè dyà Kilistò, mudimu wà bwambi wà buloba bujimà, utu dìnà dyèndè kacya dijikakù nè h-a-m, bu A-b-r-a-h-a-m, too nè ditùkù edi. Sankey, Finney, Moody, Knox, Calvin; kàdi nkwpèi kùvwàkukù G-r-a-h-a-m kwònsò eku, Billy Graham, mutangadiki munène awu kuntwaku nè màngumba àdi mu Sodomà awu? Kacyapù. Oral Roberts wa cyena leelù ùdi kuntwaku nè beena Mpenta, cintu cìmwècìmwè aci. Nuvwakù bamanyè nànkù anyi?

¹³¹ Kàdi, h-a-m! Mpindyewu, G-r-a-h-a-m ùdi màleetà ànu àsambòmbò, kàdi A-b-r-a-h-a-m ùdi yèyè màleetà mwandamutekète. Isambòmbò n'nombà wa muntu, bulongololodi bwà muntu, cyenzedi cyà muntu; kàdi A-b-

r-a-h-a-m ùdi màleetà mwandamutekète. Mpindyewu mònaayi, mu Èkèleeziyà, basungula, bàdi bakòkiibwe bapàtula pambèlu abu, kî mmàngumba awu to, kàdi Èkèleeziyà musungula bwà kwimana pambèlu, ùdi nè cyà kupeta mùsànjeelà, yèyè pèndè, mu matùkù à ndekeelu aa.

¹³² Cidì munkaci mwà kwenzeka kuntu kwàka ncinyi? Cidì munkaci mwà kwenzeka kaaba aka ncinyi? Cifwànyikijaayi nè cyàkambà Yesù. Kacya kumpàlà mu maalu-malonda katùtukù banji kupeta dileejiiibwa adi to. Nè bimanyinu bimwèbimwè bivwà bifwànyine kwikala byenjiibwe! Kanwènaayiku nufika ku dymvwa anyi, balundà bàanyi, nè nujingulula nè n’Nzambi ùtùuluka mu Èvànjeeliyò, mu cisamba Cyèndè, mwikàle ùDìmanyisha? Kanwènaayikù mwà kujingulula dîbà ditùdimù nè mwoyi edi anyi? Tudikù ànu baditwe mu dituuta bikàshì ndambù mukesè, twimba pyànò, nè kwamba *cikampàndà* ku mwoyi, nè—nè kulaluka kuya kule nè Dîyì, mu mùshindù wà nè tudi bafòfòmìjiibweku anyi? Mu bushùwà katwèna nànkù to. Tùjingululàayi dîbà ditùdimu nè mwoyi edi.

¹³³ Peetèlò, Natàna, anyi Natànaèlà’s wè, èyowà, nè mukàjì awu, bôbò bàdi bàcijingulula. Bôbò, bôbò—bôbò bàakajingulula cimanyinu Cyèndè, cimanyinu cyà Maasiyà.

¹³⁴ Byà mwomùmwe mpindyewu ànu nè bintu bìndi ngàmbe ebi. Pashìishe bwà eci cikondo, Yesù wàkamba. . . Mpindyewu tàngilàayi, Yèyè ùdi ùleedila ku cikondo mpindyewu, ùbàmila bwà cikondo kampàndà. Nzambi, mu cikondo kanà cyònsò, pàdiYe ùtùma Mukenji Wèndè, ùvwà Dîyì Dyèndè, nè muDìmanyishe bwà cikondo aci; bantu bààkaCìitabuujà abu, civwa ncikondo cyà dicyònkòmoka bwàbò bôbò; bantu bàvwà kabàyi baCìtábùùje abu, bààkabwela mu cimvundù cinène. Ke mùtùbi misangu yònsò.

¹³⁵ Ànu bu mu matùkù à Yesù, cintu cìmwècìmwè aci. Mutàngilaaayi mùdiYe mwimàne kaaba aka mpindyewu. Yèyè nè: “Ànu mwàkadibi mu matùkù à Yona amu, mu Yona; bwalu ànu mwàkadì Yona mu difù dyà mushipa wà balèna, munda mwà matùkù àsàtù à muunya nè à bufùkù amu, ke mùdi kàbìdì Mwàna wa muntu nè cyà kwikala.”

¹³⁶ Yèyè wàkamba nè: “Lukòngò lwà beena lwonji nè beena masandi nelùkebe cimanyinu.” Mpindyewu nudi bamanyè cìndì ngèela meeji nè Ùvwa wènta aci anyi? Ùvwa wàmbe cipròfetà nè: “Lukòngò lwà beena lwonji nè beena masandi.”

¹³⁷ Ndi ndikonka muntu kanà yònsò udi mwikàle nè meeji èndè mu ôwò ní mmufwànyine kuvila nè katwèna nè mwoyi mu lukòngò lwà butekète nè lukòngò lwà masandi to, pàdi balùme nè balùme babàkàngànè, cinyangu! Nè cipidì cyà difwà dyà dibàkà mu Àmèrikè ncibànde kutàmbe ditùnga dikwàbò kanà dyònsò edi pa buloba. Nè buloba bujimà mbuyè mu cimvundù cyàbù. Bàsàtù pa bànaayi bònsò, menemene, mbashipè dibàkà;

eku nè eku, pa kwangata cintu aci mu kaabujimà eku nè eku mu bidimu dikùmi byà dibàkà. Nwamònu anyi? Anji elààyibi meeji pa bwalu abu's! Bàshipa dibàkà, bàsèlanga cyàkàbidi nè bàsèlangana cyàkàbidi, bàshipa dibàkà nè bàsèlangana cyàkàbidi. "Bàvwa bàdya, bànwà, bàsèlangana nè bakàji nè bàsèleshangana." Tàngilàayi díbà ditùdi nè mwoyi edi. Ndíbà kaayi dikaadici kacya cifikè ku cimvundù cyà mùshindù awu's?

¹³⁸ "Lukòngò lwà beena lwonji nè lwà masandi nelùkebè cimanyinu," mònaayi, nènku nebàpetè cimanyinu. Cinyi? Lukongo elu. "Bwalu ànu bu mwàkadi Yona mu difù dyà mushipa wa bàlenà, munda mwà matùkù àsàtù à muunya nè à bufùku, mwànà wa muntu ùdi ne cyà kwikala mu mwoyi wà buloba munda mwà matùkù àsàtù à muunya nè à bufùkù." Ncimanyinu kaayi cyàpetà lukòngò lwà beena lwonji nè beena masandi alu? Cimanyinu cyà dibìikà dyà ku lufù.

¹³⁹ Nènku leelù ewu, paanyimà pàà bidimu binunu bìbìdì, tucidi ànu tumòna Yesù Kilistò mu bukolè bwà dibìikà Dyèndè dyà ku lufù, mwimàne munkaci mwètù, wènza bintu byàkenzàYe musangu awu nè mulayè bwà kwenza abi. "Lukòngò lwà beena lwonji nè lukòngò lwà masandi nelùkebè cimanyinu, ùkèba misangu yònsò ànu bwà 'kundeeja cikampàndà, nènku bu wèwè mwà kwenza cikampàndà nè kwenza cikansanga.' Nebàcipetè, cimanyinu cyà dibìikà dyà ku lufù." Yèyè ùdi umwèumwè awu makèèlèlè, leelù, too nè kashidi; Diyì dimwènèshìibwe, disòmbèle munkaci mwètù. Mùshindù mwinè wùvwàbi bikèngela bwà twètù kusàkidila Nzambi bwà cimanyinu Cyèndè cinène's wè!

¹⁴⁰ Mònaayi nè Wàkaleedila ku cintu kampàndà cikwàbò kuntwaku. Yèyè kwamba nè: "Nènku ànu mwàjuukà mukalenge-mukàji wa ku sud amu," awu's ke mukalenge-mukàji wa ku Sheba. Tèelejàayi nè ntèmà mpindyewu.

Mukalenge-mukàji wa ku sud neàjuukè ku cilumbulwidi nè lukongo elu, nè neàlùpùishè: bwalu yèyè wàkafima ku bitùpà byà kuleekùlè byà buloba bwà kutèeleja lungènyì lwà Solòmò; kàdi, mònaayi nè, munène mutàmbe Solòmò ùdi apa.

¹⁴¹ Mònaayi, twánjàayibi kuleedila ku cyòci aci, mu tusunsa tukesè emu. Ùvwa ùbala Bible umwèumwè utùdi tubala ewu, bwà bwalu bwà Yona, nè Ùvwa ùbala bwalu bwà Solòmò. Mpindyewu, pààkalwà cikondo cyà Solòmò, ùvwa nè—ùvwa nè dipà dyà dijingulula. Nè bantu bònsò, ditungà dijimà, bàvwa bacítàbùùje. Muntu nè muntu ùvwa nè mwoyi wùmwè nè diyì dimwè. Bantu bònsò bàvwa bacítàbùùje.

¹⁴² Bu bantu bònsò, dilòlò edi, bu Àmèrikè mujimà, mwà kwalukila ànu kùdi Nzambi nè kwitabuuja Nzambi, nditwishiiibwa dyà ditàmbe bwìmpè ditùdi naadi, nedítambè bisokomenu byònsò byà bòmbè nè bikwàbò byònsò.

¹⁴³ Muntu nànsha umwe kààkanàyakù nè Solòmò to. Bàvwa bàmuçiina bwalu ùvwa muntu ùvwa nè mapà. Nè bantu bààkamwitabuuja nànkù awu, yêyè wàkatùmiibwa kùdì Nzambì, mu mùshindù wà nè bààkamuvwiya mfùmù wabò. Matùnga ònsò àkabàçiina; kabiyi bwà bukolè bwàbò bwà bùsàlaayi to, kàdì mbwalu Nzambì ùvwa naabò.

¹⁴⁴ Nènku pìikalà ditùnga dìdì dilàka mukana dyàmba nè ndyà beena Kilistò edi, bu dyôdì ànu mwà, bònsò bwàbò pàmwe, bakùngwile ku nyùngulukilu wa dipà dinène dìdì ditùpèèbwe mu matùkù à ndekeelu aa edi, Nyumà Mwîmpè wa Nzambì pa Èkèleeziyà. Kì ntwitabàayi to. Nyumà wa Nzambì! “Kì nku bukolè to, kì nku ngulu to, kàdì ku Nyumà Wanyì,” mùdì Nzambì wàmba. Nyumà Mwîmpè, Yesù Kilistò mu mmwènekelu wa Nyumà, pambidi pèètù nè: “umwèumwè awu makèlèlèlè, leelù, too nè kashidi,” ùvwija Dìyì edi nè mwoyi cyàkambàYe nè Dìvwa mwà kwenza aci. Tàngilàayi nè ntèmà yònsò mpindyewu.

¹⁴⁵ Kaa, nguumù yàkaya pa buloba bujimà! Kabàvwa nè ntèlèviziyò nè tudyòmà to, nè bikwàbò mu miinè matùkù awu, nguumù yivwa yènda ànu ku muntu wàmbila mukwèndè. Kàdì paanyimà pàà cikondo kampàndà milongolongo minène yà beena tuumeelù kulwàyi yìpweka yìkòsolola mu Cipèèlè cyà Sahara, cidi lwendu lwà ngondo yisàtù kuumukila ku Pàlèstinà too nè ku mwaba wùvwàye musòmbèle awu. Kàdì diitabuuja dìdì dífùma ku (cinyi?) ditèèleja, ditèèleja dyà Dìyì dyà Nzambì. Nènku yêyè ùvwa muumvwe bààkula bwà disangisha dinène edi divwàbò munkaci mwà kwenza kuntwaku, nènku musangu kanà wònsò wùvwà mulongo wà beena tuumeelù ùlwa ùfùmina kuntwaku mùshindù awu, yêyè ùvwa mwà kwela lukonko nè: “Nudikù, panùdì balwè apu nudi bapicile ku Pàlèstinà aku anyi?”

“Èyowà.”

“Kaa, kàdì bìshi bwà aci?”

¹⁴⁶ “Kaa, s’nci—s’ncipite cintu kanà cyònsò eci’s! Kacya kùtukù mwanji kumòna dijingulula dyà mùshindù bu nànkù to. Nènku bìdì ànu mùdì nzambi kampàndà musòmbè mwaba awu. Nzambì wabò mmuleejìbwe mu muntu udi ubiikidiibwa nè Solòmò.”

¹⁴⁷ Èè: “diitabuuja dìdì dífùma ku dyumvwa.” Mwoyi wà mukalenge-mukàjì mukesè awu wàkabanga kumvwa nzala bwà kubànda nè kujandula bwalu abu. Nwamònu’s, yêyè ùvwa mulongolwela Mwoyi.

¹⁴⁸ Mònaayi mpindyewu nè, cintu cyà kumpàlè cyà dyenza mpindyewu, pèndè mwikàle mumpàngaanù, byàkakèngela kuyaye kakeba dyanyisha dyà kùdì mwakwidi wèndè, bwà kuyayè. Pa nànkù ndi mwà kudìfwànyikijila mmumòna ùya kùdì mwakwidi wèndè, wàmba nè: “Taàtù wa cijila, ndi ngùm vwa nè bàdì bènza ditàbuluja dinène mu—mu Pàlèstinà

mwàmwa. Mwva mwà kuswa kupeta dyanyisha bwà kubànda nè kudimwèna.”

149 “Mpindyewu, mwanàànyì, mpindyewu kwèna muswè kubwelakanangana mu yimwè... Twamb’eku twamb’eku, twètù katwèna tukwàcishangana mu ditàbuluja adi to, pa nàнку wèwè—wèwè kwèna mwà kuya to. Nwamònu’s, aci’s cidi ànu mushikì wà lukutukutu cyanààna. Kabyèna—kabyèna nè bwà nsongo to. Bantu abu bàdi bàmba mùdibo bapicile mu Mbù Mukünze, nè mbenzè *bikampànda* nè *bikansanga* byònsò ebi. Kacyèna nè bwà nsongo to. Bu nè kùvwà cintu kampànda cyà mùshindù awu munkaci mwà kwenzèka, cìvwà cìfwànyine kwikala ànu mwab’ewu mu èkèleeziyà wetù.” Tucidi ànu nè bampàngaanù.

150 Pa nàнку tudi tusangana nè wàkabanga kuumvwa nzala. Yèyè nè: “Mpindyewu tàngilà,” yèyè nè, “bàdi bàndondela, nè: ‘Nzambì wabò kuntwaku mmuleejìibwe mu muntu, nè lungènyì lwèndè lùdi lutàmbe ní ncinyì cyònsò eci. Dijingulula dyèndè didi dikèmesha bikolè.”

“Kaa, aci kacyèna nè bwà nsongo to.”

Yèyè nè: “Kàdi ndi—ndi mufwànyine. . .”

151 “Èè, tàngilà, wèwè’s udi mukalenge-mukàjì, kwèna mwà kwikala muswikàkàne nè musùmbà wà bantu bàà mùshindù awu to. Aci’s, kwèna mwà kucyènza to. Musùmbà wà bantu awu, bamanyike pa buloba bujimà bu bakoleshi bàà maalu bàà ntèndeleeu. Kwèna mwà kwenza nàнку to.”

152 Kàdi, nudi numòna’s, pàdi Nzambì ùditwa mu mudimu nè mwoyi wà muntu, kakwèna cintu nànsha cìmwè cìikalà mwà kuwimanyika to. Bàyeebè, mukàjèebè, bàna, mpaasàtà, cintu cikwàbò nànsha cìmwè kacyèna mwà kucìimanyikakù to pàdi muntu mwikàle nè nzala yà Nzambì yà cyà bushùwà. Nebàye, nànsha byà munyì. Ke kudìlongololayè, bwà kudìlongololayè.

153 Èè, yèyè’s mmufwànyine kwamba nè: “Èè, nènkupèèshè ànu. . . Nebikengelè bwà mèmè—mèmè kukwipata mu bwobùmwè bwètù.”

154 “Èè, wèwè’s udi ànu mwà kwenza nàнку. Mèmè nènye, nànsha bishi. Nèndijandwilè mèmè nkààyanyì bwà cyònsò eci, nè kumòna.”

155 Ùkaavwa mutwàle mikànda mivùnga nè ùkaavwa mubalè cìvwà cikèngela bwà Yèhowàh kwikalayè, bwà bapròfetà Bèndè nè cidiye nè cyà kwenza, mùvwà Dìyì dyà Nzambì mwà kumwènesha, mùvwàDi mwà kumanya bintu ebi pàvwàdi dileejìibwe, mubwikila mu mubidi wa buntu, cìvwàye mwà kwenza. Nè yèyè ùkaavwa mubale maalu ònsò aa.

Pa nàнку mwva mwà kuumvwa wàmba nè: “Èè, tàngilààyi, mukànda wètù wùdi wàmba *cikampànda*,” mwàkambàye.

¹⁵⁶ “Èyowà, tàngilààyi, ndi . . . kakwèndè mukàjì wa kakwanyì ùvwa mwimàne kumpàlà kwà mpìngù yìmwèyìmwè ayi. Wàkiimana nè kwamba masambila, ku ditùkù nè ditùkù. Kacya kakùvwakù dinyungakana nànsha òmwè to, dinungana nànsha òmwè, anyi cintu nànsha òmwè cikwàbò. Kàdi ndi mucyòke, mmwènekeli mufwè wa kale ewu. Ndi muswè kuya kamòna ní kùdi Nzambi udi nè mwoyi.” Mbibi be mutùdi katùyi ne bakalenge bakàjì bakwàbò bàà bwena abu leelù ewu.

¹⁵⁷ Ke kudilongololayè bwà kuya. Mpindyewu pàakafikàye pa kaaba aka kàà nè ùdi cyà kuya, mpindyewu, vùlukààyi nè, ùvwa nè lutàtù lunène. Kabìvwa ànu bipeepèle mùvwàbi mwà kwikala kùdi to. Mpindyewu mònaayi cìvwàye nè cyà kwenza.

¹⁵⁸ Cìkwàbò cintu cìndi muswè, cìndi ncìyi muswè kushìiya ncýòci eci. Kwambayè nùku: “Nènye kuntwaku, nè nêngàngatè ndambù wa mfranga. Nêngàngatè ndambù wa mapà. Nèku cyòci bulelèlè, nèncitwè nyama ku mikòlò. Cyòci kacìyi bulelèlè to, dîbà adi ndi mwà kwaluja mfrangà yànyi ayi.”

¹⁵⁹ Mukàjì awu ùvwa mwà kulongesha beena Mpenta. Èyowà’s, mukalenge. Kutwà bintu nyama ku mikòlò kuntwaku bìdi bìseka nè byèlulwila dyondopa dyà kùdi Nzambi, kàdi nànsha nànkù nudi nutwa ndongamu yà ku tudyòmbà ayi nyama ku mikòlò pamutù pàà èkèleeziyà wenù sungasunga, ncýà bushùwà, kàdi bàseka nè bèèlulwila bintu mene byùdi witabuuja abi.

¹⁶⁰ Kàdi yèyè kwamba nè: “Nènyàngatè. Nèku cyòci kacìyi cyà bushùwà to, ndi mwà kwalukila naayi.”

¹⁶¹ Mpindyewu vùlukààyi nè, nè mabanji wònsò aa kuntwaku, pa tuumeelù etu. Nèku mpindyewu vùlukààyi nè, babàndi bàà pa túbàlù bàà Ishàmèlè bàvwa bìvi bàà mu cipèèlè, bàvwa pambèlu apu. Ncintu kaayi cipeepèlè cìvwàci cìfwànyine kwikala bwà bòbò kubùcikila bi—bintu ebi, nènkù, mòna’s, bàvwa mwà kwikala bashebèye ndambù wa batungula bàvwa nendè abu, nè bangàte mfrangà ayi nè bayè.

¹⁶² Kàdi kùdi cintu kampànda pa bwalu abu, paùdi mupàngàdike bulelèlè, nè Nzambi ùdi munkaci mwà kuDìbuulula, udi mupàngàdike bwà kumòna Kilistò, kakwèna njiwù kumpàlà kwèbè to. Kwèna nànsha utùmakù ntèmà nànsha yà kàna to! Ngàngàbukà ùdi wamba nè neufwe, kwèna nànsha ucimòna to. Paùdi ukolesha ku mwoyi, udi mumanyè nè kùdi cintu kampànda muntwamu.

¹⁶³ Cintu kampànda munda mwà mwoyi wèndè, cìlàkuka kapyà, diitabuuja mu Nzambi ewu! [Katùpà kàà mukàbà wà mèyi munda mutupù—Muf.]. . . ngondo yìsàtù bwà kwenza lwendu kupicila mu Cipèèlè cyà Sahara amu. Kì mmu màshinyi à Cadillac à èla cyashima to. To, to. Wàkapicishila ngondo yìsàtù mu Cipèèlè cyà Sahara, pàmwàpa wènda wènda lwendu ciibufùku, munkaci mwà kubala mikànda mivùnga, mu mwaba wà màyi mu cipèèlè mundamuunya, too nè mwàkafikàye.

164 Mpindyewu, kabyèna bikèmesha to mwàkambà Yesù nè mukàji awu neìmanè mu matùkù à ndekeelu nè neàpiishè lukòngo elu, bwalu bàmwè bàà kùdibo kabààkwendela mu mùsèèsù to; nè munène mutàmbe Solòmò ùdi apa, Nyumà Mwimpè Yèyè mwinè. Nwamònu anyi? Kabyèna bikèmesha to mwàbiikàye ku lufù mu matùkù à ndekeelu nè kupiisha lukòngò alu!

165 Tàngilàayi, ndekeelu wa byònsò yèyè wakafika. Kàakalwa mùtù bantu bààbùngì bàlwa to, bàmwè bantu nebàlwe mu disangisha dyà pabwàdi. Kulwaye nè kwangatàye tumeelù twèndè, nè kupàtuka kubwela mu bula, kwasayè ntenta yèndè, nè ùvwa nè cyà kushàala muntwamu too nè pàvwàye nè cyà kutwishiibwa.

166 Bantu bààbùngì nebàlwe, bàsòmba pàmwàpa mu tusunsa tùtaanu, pàmwàpa makùmi àbìdi nè tùtaanu. Pàdi ànu mutangadiki anyi muntu kampàndà wàmba cintu kampàndà cyà cibèngangana nè cidiye—cidiye wèla meeji nè twitabàayi wèndè ùdi wàmba, anyi wèndè, twitabàayi wèndè, kupàtukabò kuya. Nwamònu's, kakùyi nànsha mene dimanya dyà maalù to. Kabyèna bikèmesha to mwàpiishàye lukòngò elu; wàkalwa bwà kushàala too nè pàakatwishiibwàye.

167 Ndi mwà kudifwànyikijila disangisha dyàkumpàlà mu dindà adi, pàakadila mpungi yònsò ayi, Mpaasàtà Solòmò kupàtukayè. Ùvwa mwà kwikala musòmbè lwà paanyimà menemene. Yèyè nè: “Mpindyewu nèndimwènènè. Ndi mumanýè nè ke cidi Yèhowàh nè cyà kwikala. Muntu ùdi mwà kwamba maalù, kàdi mèmè néjandulè.” Ki kusòmbayè mwaba awu ditùkù adi nè kutàngilayè, nè kumònayè muntu yònsò ùlwa ku cyambilu aku. Kumònayè nè dijingulula adi òvwa dipwàngàne.

168 Ndekeelu wa byònsò, twàmbè nè kartà kèndè kàà disambila kàvwa kabìikidìibwe, bìvwà pàmwàpa kabiýi nànkù to, kàdi dìbà dyèndè kukùmbanadi bwà kulwayè kumpàlà kwà Solòmò. Nè Bible mmwambè, nè: “Pàakalwàye kwimana kumpàlà kwà Solòmò, nè Nzambì wàkamanýisha Solòmò minsokòntù yèndè yònsò. Kakùvwa cintu nànsha cìmwè cisokoka to.” Dìbà adi cishimà aci cìvwa cimwenzela.

169 Pashiishe kukùdimukayè mu batèèleji amu, nè kwambayè nè: “Bintu byònsò bìmvwà mùmvwè ebi mbilelèlè, kàbìdi mbinène mene bitàmbe bìmvwà mùmvwè bàmba abi.” Nwamònu anyi? Kaa, kakùcìvwa kàbìdi mwoyi mushààle munda mwèndè to, mweyelu wèndè wàkuumushiibwa munda mwèndè, bwalu muntu nyèyè ewu uvwa kàyi mumumanyè to, mwenyi, kusokolola bintu bìvwàye muswè kumanya.

170 Kaa, kàdi Yesù mwimàne mwaba awu, uvwa mutàmbe Solòmò awu's! Yèyè ùvwa kaabujimà kàà Bunzambì mu mùshindù wà mubidi. Yèyè ùvwa Mwànà wa Nzambì mulela kùdi virgò. WàkaMuvwàdika, nè Yèhowàh Yèyè mwinè

mumwènèshìibwe mu mubidi. Kàdi's ki Yèyè ewu mwimàne mwaba awu mu kaabujimà, ke kwambabò nè kabàvwa mwà kuMwitabuuja to, dijingulula ditàmbe bunène. Nwamònu's, Yèyè ùvwa Solòmò kusangisha nè Davìdì, kusangisha nè bakwàbò bònsò bàvwa munda Mwèndè. Bapròfeta bònsò bàvwa bavùngila munda Mwèndè, munène mutàmbe Solòmò.

¹⁷¹ Nènku nànsha mene mu ditùkù adi, Yèyè wàkamba nè: “Nwènu baakùle mèyi mabì awu Bwànyì, Mèmè nènñufwìlè luse. Kàdi pààlwà Nyumà Mwìmpè, yèyè neikalè munène kutàmbe mùdìbì mpindyewu emu, nè dipiishibwa ditàmbe.”

¹⁷² Kàdi's ke twètù aba biimàne leelù ewu munkaci mwà kumòna Nzambì umwèumwè awu wènta cintu ànu cìmwècìmwè aci's! Ndi ngiitabuuja nè yèyè neàjuukè mu Ditùkù dyà Cilumbulwidi nè neàpiishè lukòngo elu, bwalu wàkanyingalala nè wàkiitabuuja mukenji wùvwà Solòmò ùyiisha, nè kwitabuuja Nzambì. Wàkamòna cintu kampàndà cyà cilelèlà.

¹⁷³ Nudi bamanyè's, lutàtù lùdiku leelù ewu ndwà nè, kùdì bantu, bantu bààbùngì, nè bantu bàdì bàà mu èkèleeziyà nè biikàle ànu bàya mu èkèleeziyà nè biikàle nè twitabàayi kampàndà, nwamònu's, bàkaadi bamònèmòne ànu byà mafi bùngibì, ànu mpìngu bùngiyì, nè nzùbu minène milenga bùngiyì. Nè—nè, twètù, katwikadi—katwikadiku twangaciibwa mu byà nànkù abi to. Nwamònu's, Nzambì kàtu ùsòmbela mu nzùbu minène to; Ùtu ùsòmbela mu mwoyi wèbè. Nwamònu's, Nzambì kàtu ùsòmbela mu dilonga dyà mamanya à mu mutù to; Yèyè ùdì kule naaci. Ùtu ùsòmbela mu didipwekesha, mu mwoyi wèbè.

¹⁷⁴ Yèyè mmusòmbèle mu Dìyì Dyèndè, nè Dìyì Dyèndè didi dibwela mu mwoyi wèbè nè dyàkula Dyòdì diinè, nè dyàmba patòòke. Yèyè ùdì ùmwijila Dìyì Dyèndè Yèyè mwìnè ku wèwè. Udi ùteeta kupeta muntu kampàndà udiYè mwà kutwà byanza, bwà kuleeja nè Yèyè ùcidi ànu Nzambì. Nwamònu anyi? Nènku Yèyè ùdì, Yèyè neénzè aci bu Yèyè ànu mwà kupetakù muntu kampàndà udiYè mwà kwakula nendè. Bu Yèyè mwà kupeta mukàji mukwàbò uvwa nè dīsaamà dyà mashi àlwa munda awu, Yèyè ùcidi ànu mwà kwamba cintu cìmwècìmwè aci. Yèyè ùcidi ànu mwà kwenza cintu cìmwècìmwè aci, ùmanyisha, wàmba patòòke. Tudi mu Bwikadi bwà Nzambì, katùyì tuBùjingulula to.

¹⁷⁵ Cidi cìmvùlwija kaabwalu kakesè. Mwua mufwànyine kwikala munwàmbile cyòcì aci musangu kampàndà, ncyèna mumanyè to. Ndi mwa kunwàmbilaci mpindyewu mene. Bu munùdì bamanyè bònsò, ntu—ntu ndemba nyama minène. Nènku mwua nsanganyibwa lwà mu meetu à mu Nord mwàmwa, mwua nè ciibidilu cyà kuya muntwamu bwà kulemba, dībà dyònsò. Kàdi mwua nè mulundà wanyì kuntwaku dyèndè Bert Call. Yèyè's ùvwa cilembi wa kateèlâteèlè, mwikale citùpà Indien. Kabivwakù bikèngela bwà kuditacisha mu meeji bwà bwalu

bwèndè to, kàvwa mwà kujìminakù to. Nènku tuvwa bulelèlè baanyaana, kàdi's awu ùvwa muntu wa mutàmbe cikisu ku bônso, mu mwoyi wèndè, ùntù ncìyì mwânjì kumòna to. Yèyè kàvwakù ànu nè mwoyi wà munda to nànsha kakesè. Ùvwa nè ciibidilu cyà kwasa twànà twà tushà, mbwena kwamba nè twànà tukesè twà tushà atu, ànu bwà kumfikisha ku didyùmvwa bibi. Nènku ùvwa mwà kwamba nè: "Kaa, nwènù bayiishi aba's nudi beena bwôwà. Billy, udi mufwànyine kwikala cilembi mwîmpè bu nè kùvwa muiyishi to." Yèyè nè: "Wèwè's udi mwena bwôwà wa dikèrà."

Mémè nè: "Bert, aci kî nkwikala mwena bwôwà to."

¹⁷⁶ Mpindyewu, bìdi ànu bîmpè bwà kushipa kânà kàà kashà bu nè mikenji yìvwa yàmbe nànkù. Abraham wàkashipa kânà kàà ngombe nè kukàdiisha Nzambi. Kî mbwà bunène bwàkù anyi bulùme ànyì bukàjì bwàkù to.

¹⁷⁷ Kàdi bìdi ànu pa kubyenza nè cikisu's, nènku ùvwa mufwànyine kwasa ànu twànà twà tushà atu ànu bwà kuseka, kusekesha bwalu mvwa ndyùmvwa bibi bwà bwalu abu. Èè, mpindyewu, yèyè—yèyè ùvwa wènzà nànkù.

¹⁷⁸ Kàdi cidimu kampàndà mémè kuya kuntwaku. Nènku ùvwa mudyenzèlè kashibà kakesè kàvwàye mwà kwela, kàdila ànu bu kânà kàà kashà, mûshindù wùtùku kàbìikila mamwàkù, nudi bamanyè's. Ke pa nànkù kwambayè nè: "È, Billy, kumpàlà kwà twètù kubanga mu dindà emu," yèyè nè: "Ndi muswè nkuleeje cintu kampàndà cîndi naaci." Ke kucîndeejayè.

Mémè nè: "Bert, kwèna mufwànyine kukwàta mudimu nè cintu bu nànkù to."

¹⁷⁹ Yèyè nè: "Kaa, àlùkilà mu wèwè." Kàdi mulùmyànà awu ùvwa nè mèsù ànu bu mùsodyà, ànu mùtù bàmwè bàà ku bakàjì aba bàteeta kupenta mèsù àbò, nudi bamanyè mùtùbì's, mùshindù awu. Nudi bamanyè, kuntàngilayè, nè mèsù èndè à mmwènekèlu wà mùsodyà awu, nè dîsù, divwà dyàmbe kunkwàcisha bwôwà.

Ke—ke mémè kwamba nè: "Bert, kwenji nànkù to."

Yèyè nè: "Kaa, nwènù bayiishi beena bwôwà's nwè!"

¹⁸⁰ Pa nànkù tuvwa—tuvwa...Mvwa mubiike pashiishe ndambù musangu awu. Nè ngulungù yà ku nord ayi... Ngulungù wenù wà mpàndà ewu, s'nease lwendu mutàngile kùdi, kàdi kî ngumwe wa ku balùmyànà abu to. Bòbò ànu bamanè kumwasa bamupangile, yèyè ùdi...Nwènù bàdì bààkula bwà Houdini bu mupànduki mupilùke, yèyè's ngwa kànàkànà, bwàbò bòbò. Pa nànkù dîbà dikaavwa dipite nè bàkaavwa baashiibwe. Nè tushà atu tùvwa tusokòme lwà panshì, tùdya bufùku mu bukènkè bwà ngondo, nè tùlààla mundaamuunyà. Twètù kuya too nè kuulu aku ku Jefferson Notch wa kale awu, too nè ku Mukùnà wà Washington kwàka.

Kwàkadi, kùvwa nêjè mushikì wà centimètres dikùmi nè yìtaanu panshì apu, cikondo cìmpè cyà dilonda mupwa; katùvwa mene bamòne mupwa nànsa wùmwe.

Yèyè nè: “Udi wela meeji bìshi, Billy?”

¹⁸¹ Mémè nè: “S’ngwèwè awu muyìkwàcishe yònsò bwôwà mwab’ewu, nè bingoma byà kale byà mwambuyi byùdì munkaci mwà kutuuta abi.”

¹⁸² Ke twètù kutùngunuka. Paanyimà pàà katanci, lwà pa díbà dikùmi nè umwe jaajaaja. Tuvwa misangu yònsò ànu ne kàmwè kàà—kàà ku tulàngi twà tuutèèlèmosà tukesè tûle ntèntè nè shòkòlâ yà luuya. Mbwa nè wèwè mutàpìke, anyi cintu kampàndà cikwàbò, cidi ndisalula, nè dyàmpà dyela minyiinyi. Pa nàнку tukaavwa bu pa díbà dikùmi nè ùmwè anyi díbà dikùmi nè ùmwè nè tusunsa makùmi àsàtù, ngèèla meeji, twètù kufika ku diitu dyà micì palepale diipacila bunène bwà cipalu eci, anyi nzùbu ewu, kàdi kakùyì mucì nànsa wùmwe. Pa nàнку kwenzaye ànu bu musòmbèle panshì, mweyèmèje cingomba cyèndè ku mucì kampàndà, kubangayè kwolola cyanza lwà paanyimà *apa*. Nèнку mwà ndyàmbidila nè ùvwa wàlukila bwà kwangata wèndè—wèndè mulàngi wà tèèlèmosè. Mémè kudyàmbidila nè: “Èè, netùdye’s.”

¹⁸³ Pa ciibidilu tudi tufika ku lusongo lwà mukùnà aku nè tudyà, nè ewu ùya mu njila kampàndà nè ewu ùya mu mukwàbò, nè kwalukila. Nèнку’s tuvwa bamanyè nseke yònsò, bimpè. Kàdi twètù bapetè kashà, tuvwa ànu tukàlembejeja kuulu aku, nè pashìishe tudi bamanyè, tuya tukambulwishangana muntu nè mukwèndè bwà kuyibweja. Pa nàнку mémè kudyàmbidila nè ùvwa ànu nè cyà kudyà cyàdidyà cyèndè cyà mundaamuunyà, nè tuvwa mwà kutàpuluka, bwalu cívwa lwà kuulu mu micì. Pa nàнку mémè. . .

¹⁸⁴ Kwololayè cyanza paanyimà. Ke mémè kutwàdija kwangata mùlàngi wànyì wà tèèlèmosè awu, kwangata shòkòlâ wanyì, nè kutwàdija kumupàtula mùshindù awu. Ke yèyè kupàtula kashibà kakesè kàà kale aku mu dibèngà dyèndè, nè kwelayè kashibà kakolè mùshindù *awu*. Nè kuntàngilayè nè mèsù à mmwènekèlu wa mùsodyà awu cyàkàbìdì, kàdi kwela kashibà aku. Nèнку pààkenzaye nàнку, ànu bu mu ntàntà wa eku nè eku kwà nzùbu ewu, dishina dinène menemene dyà kashà kajuukila kuulu.

¹⁸⁵ Mpindyewu bu bàmwè bàà ku bàna bèètù bàà bakàjì mwà kwikala kabàyi bamanyè to, dishina mbwena kwamba nè maamù kashà. Nèнку, nwamònu’s, kashibà aku kàvwa kàna kakesè, nèнку kudilakù, ke maamù kashà munène ewu kwimànyina kuulu. Nèнку ànu lwà pa díbà dikùmi nè ùmwè jaajaaja wa ditùkù, muntu kanà yònsò utu ulemba tushà ewu mmumanyè nè aci ke cikondo cibì. Ntulààle tulù.

¹⁸⁶ Ke maamù ewu kujuukila kuulu nè kukènzakana. Mwva mwà kumumòna ànu bitòòke tòò. Kwalujayè mèsù kùndi, nè kwelayè kàbidì kashìbà. Kàdi pamutù pàà—pàà kunyeema, kwasayè lwendu kupàtuka buludi mu diitu dyà mici palepale adi.

¹⁸⁷ Mpindyewu, aci's ncyà pabwàci. Yôyi kayitu yènza nàнку to. Cilembi kanà yònsò ewu mmumanyè aci. Nè yôyi kayi—nè yôyi kayitu yènza nàнку to. Kàdi kupàtukayè ànu mwaba awu. Bwà cinyi? Ûvwa maamù; awu ùvwa mmwànà. Cìvwa, nwamònu's, ncintu cilediibwa ànu munda mwèndè bwà kwikalayè maamù, nè mwànà awu.

¹⁸⁸ Kàdi ke Bert kutàngila panshi, kupulumuna ndende cyànyimà, kumupwekeshayè pa cingoma cyà makùmi àsàtù-cijèngu-isambòmbò aci. Kàdi's ùvwa mwashi wa ndudi wa dipòkò. Ke mèmè kumumòna upwekeshila panshi mùshindù ewu, nènku mwva mumanyè nè ùvwa mwà kutaayisha mwoyi wèndè wà lulamatu awu nè kuwùsùnsula mu nseke yònsò yibidì ayi, nè dìzaji dyà ntende munda lukàmà nè makùmi mwandamukùlù adi. Ke mèmè kudyàmbidila nè: "Mmunyi mùdi mwà kwenza nàнку's, Bert? Mmunyi mùdi mwà kwikala nè cikisu bu nàнку, bwà kubìikila maamù kashà awu bwà kupàtukayè muntwamu nè pashìishe kumutaayisha mwoyi wèndè, pèndè ùteeta bwà kupeta mwanèndè? Mmunyi mùdi mwà kwikala nè mabàjà à mùshindù awu bwà kwenza nàнку?" Mwva mukanci mwà kudyàmbidila nàнку. Ke mèmè kumumòna ùpwekeshila panshi ùludika mùshindù awu.

¹⁸⁹ Kàdi ncìvwa mwà—ncìvwa mwà kutàngilakù to. Bìvwa bikolè be. Ndi ngèèla meeji nè ndi mwena bwòwà. Mèmè kukoma ànu nyimà cyanàànà, ke mèmè kudyàmbidila nè: "Nzambì, mmunyi mùdiye mwà kwenza nàнку's? Mmunyi mùdiku muntu mwà kwikala nè cikisu bu nàнку, bwà kwenza nàнку, ànu bwà kwasa mwoyi wà wènza luse wà maamù bu nàнку kumutaayishawù's?"

¹⁹⁰ Mpindyewu, maamù ewu kàvwa ùteeta bwà kudìngidija to. Kàvwa wènza madileeki to. Yèyè's ùvwa maamù mwena diinà. Ûvwa mumòne cilembi awu pààkapàwulàye cingoma aci, kàdi wàkanyeema anyi? To, mukalenge. Mwanèndè ùvwa mu lutàtu, nè ùvwa ùteeta bwà kupeta mwanèndè awu.

¹⁹¹ Ke mèmè kukoma nyimà, mùngàmbi, nè kutwàdija. Mèmè kwamba nè: "Mukalenge Nzambì, mmunyi mùdiye mwà kwenza nàнку's?" Mèmè kumòna, nè kwindila, kwindila, cingoma dilààku nè dila wèwè.

¹⁹² Ke mèmè kukùdimuka è kutàngila, nènku cingoma aci cìvwa cyènda ciya mùshindù ewu. Kàcìvwa kàbidì mwà kucikwàta to. Kukùdimukayè, mèsù manène à kale à mùsodyà awu àkaavwa mashintùlùke, binsònji bimupwekela pa matàma.

Kwimanshayè cingoma panshi, kàdi kwambayè nè: “Billy, byàntondì. Ndombòlèku kùdi Yesù ùdi wamba awu.”

¹⁹³ Ànu pa nèjè apu mèmè kumulombola kùdi Kilistò. Bwà cinyi? Wàkamòna cintu kampàndà cilelèlè, wàkamòna cintu kampàndà cishùwashùwâlè. “Bòbò bashààle . . . bapùwe, mabwe neèlè mbilà.” Maamù awu kàvwa ùdìngidija cintu nànsha cìmwè to. Ùvwa maamù mushùwashùwâlè. Nànsha cyôci ciikale lufù, anyi ciikale cinyi, yèyè ùvwa mwimàne buludi mukùngàmàngàne nè lufù, mumanyè nè ànu mu kasunsa kanà kònsò nàka dizaji adi ndimfwànyine kutaayisha mwoyi wèndè awu, kàdi yèyè ùvwa wènda ùkèbangana nè mwanèndè awu.

¹⁹⁴ Kaa, twìkalapù ànu mwà kwikala beena Kilistò ànu mùvwà kashà aku kiikàle maamù amu’s wè! Bwà cinyi? Kòkù kàvwa kalediibwa maamù, kààkalediibwa bwà kwikala maamù. Tudi balediibwe bwà kwitabuujà Dîyi dyà Nzambi. Tudi balediibwe bwà kwitabuujà Yesù Kilistò.

Twìnyikàayi mitù yètù.

¹⁹⁵ Mbanganyi mwab’ewu mpindyewu mene, nè cyanza cyela muulu, bàdi bafwànyine kwamba nè: “Mwanèètù Branham, ncyà bushùwà nè ndi muswè kwikala mwena Kilistò wa mùshindù wàkadi kashà kakàji aku maamù amu. Ndi—ndi njinga nè mwoyi wànyì ùvwa mwà kwikala ànu mùle tètè nè Kilistò mu mùshindù wà mèmè mufwànyine kwimana kumpàlè kwà cintu kanà cyònsò nè kwikala mwena Kilistò mulelèlè ànu mùvwà kashà aku maamù amu. Mèmè, aci’s ke mùshindù wà dilabula dīndi mèmè muswè”? Udikù mwà kwela cyanza muulu anyi? Nzambi àkubènèshè. Abi’s mbimpè. Nzambi àkubènèshè. Bāābūngi be, myaba yònsò. Ndi nè kusàkidila kuvulè bu munùcidì biikàle nè cintu cilelèlè cikumbàne munda mwènù ciikalà mwà kunùfikisha ku diitabuujà.

¹⁹⁶ Nwamònu’s, ambàbi tǔng bu biikala nè kùvwa mwitabùùje? Aci kī ncifwànyìnekù kwikala cyà cyèenza luse anyi, pa kumòna mwena bupidyà mu mwaba wùdi myoyi yàbò mipapàkàne bikolè mu mùshindù wà kabàyikù mwà kwitabuujakù to nànsha kakesè, bapiishibwe, bayè, bajimine, kabayi bamanyè kantu nànsha kàmwè pa bwalu abu to, kabayi bamanyè nè ndibà kaayi didi lufù mwà kukookola ku ciibi to? Bìkèngela nùkabwelè mu Cyendèlèlè.

¹⁹⁷ Ke Yesù kwamba nè: “Muntu yèyè kàyi mulediibwe cyàkàbìdì to,” mulwè mwena Kilistò ànu mùvwà kashà aku maamù amu, “kwàdyàkumònakù Nzambi to; kwèbè nkujike, nànsha wèwè mukashààle wa mu èkèleeziyà búngi kaayi.” Ùvwa wàkula nè mulombodi wa ntèndeleeleu wa ditùkù adi, Nikòdemè, muntu wa bidimu makùmi mwandamukùlù, nè kumwambila nè ùvwa nè cyà kulediibwa, ùdi nè cyà kulwa mùshindù wà mwena Kilistò ànu mwàkadi kashà aku maamù kuntwaku.

198 Kùvwa kampàndà uvwa kàyi mwele byanza byèndè muulu, udi mumanyè menemene Bwikadi bwà Nzambi, muBùjingùlùlè nè wàmba nè: “Ndi mumanyè nè ndi mupìile” anyi? Paùdì ujingulula nè udi mupìile, udi munkaci mwà kujingulula Bwikadi bwà Nzambi.

199 Kàdi paùdì kùyi mumanyè nè udi mupìile to, Bible mmwàmbè nè: “Udi mukèngeledi wa luse.” Mu eci cikondo, èkèleeziyà mmufwànyine kwikala “mukèngeledi wa luse, mwena dikènga, mupèlè, mpofo, nè butakà, kàdi kàyi mucimanyè to.”

200 Anjì elààiyibì ànu meeji nè bu mulùme anyi mukàji yèyè ùsanganyibwa mu mùsèèsù, mukèngeledi wa luse, mpofo, mupèlè, mwena dikènga, nè butakà, kàdi udi mwà kumwambila nè ùdi butakà, nè mmufwànyine kukutèeleja, kàdi ambàbi tǔng bu nè ùdi butakà kàdi kàyi uciitabuuja to? Ngiikàdilù wa mutù kaayipu awu’s wè!

201 Èè, mpindyewu, awu’s ke mùshindù wà ngiikàdilù wa nyumà udikù. Bantu bàdi mpofo mu nyumà, bakèngeledi bàà luse, beena dikènga, butakà kumpalà kwà Nzambi, bangènzàmpèkààtù bàteeta bwà kudibwikila paanyimà pàà mabèji à mfigi à dǐngumba kampàndà, kàdi kabàyi bacimanyè to.

202 Udikù mwà kwela cyanza muulu anyi, muntu mukwàbò? Nzambi àkubènèshè. Ncyà bushùwà. Mukalenge àkubènèshè. Kumpalà kwèbè, pàmwàpa wèwè udi mwenyi mwab’ewu, kacya kùtukù mwanjì kumòna Nzambi wènta cintu nànsha cìmwè to, kàdi kumpalà kwà wèwè kumòna cintu kampàndà, wèwè ucidi ànu, wèwè wamba nè: “Nènciitabilè pa nshindameenu wa Dìyi. Ndi mumanyè nè munène kutàmba Solòmò ùdi kaaba aka; Nyumà Mwímpè munène wa Nzambi ùdi kaaba aka. Ndi nCyùmvwa. Ndi nCiitabuuja. Nèngèlè cyanza cyànyì muulu. Ndi ngènzàmpèkààtù; nèndombè lupàndù.”

203 Taatù wa mu Dyulu, bèneshàku aba bàdi nè byanza byàbò byela muulu. Tudi tulòmba bwà luse Lwèbè lùfidiibwè kùdi aba bàdi—bàdi bangènzàmpèkààtù. Mbwenà kwamba nè, pàmwàpa mbàà mu èkèleeziyà. Bòbò, aci kacýèna ànu cyùmvwija nè kī mbangènzàmpèkààtù nànsha. Nèku mbeelè byanza byàbò muulu nè, mbaswè kusùngidiibwa. Mukalenge, kùvwa Cintu kampàndà pabwìpi naabò. Bààkajingulula Nyumà Mwímpè mwaba awu. Nè bòbò—bòbò bààkajingulula nè Cìvwa n’Nzambi, nè Cìvwa cyàkula naabò, nè, nè kabàvwa nè dilabula divwà dikengela bwà bòbò kwikala naadi to, nè mbèle byanza byàbò muulu.

204 Wèwè wákamba nè: “Ewu wálwa kùNdi, Ncyàkumwipatakù to nànsha byà munyi.” Nè ndi mumanyè nè aci ncilelèlè. Wèwè wákamba, mu Yone Munsantu 5.24 nè: “Ewu udi umvwa Mèyi Àànyì nè wìtabuuja Ewu udi muNtùme, ùdi nè Mwoyi wà kashidi; kààkupìcila ku Cilumbulwidi to, kàdi wàmanyi kuumuka ku lufù nè wáyì ku Mwoyi. Ewu udi ulwa kùNdi,

Mémè nêmmupèèshè Mwoyi wà kashidi, nêmmubiishè ku lufù ku matùkù à ndekeelu.” Ke milayi Yèbè nyôyi ayi, Taatù.

²⁰⁵ Ndi nnana muntu nè muntu wa kùdìbo. Pàmwäpa mwena Kilistò kampàndà, Mukalenge, udi uteeta kwenda mu nsòmbelu, uteeta kwikala nè nsòmbelu mutàmbe bwîmpè, ditùkù dyònsò edi, nènku bàdi—bàdi bàjinga dilabula dyà—dyà—dyà lwendu lwà lutàmbe bwîmpè, bàvwa pààbò belè byanza byàbò muulu. Taatù, ndi ndòmba bwà Ùbàbènèshèku. Swàkù bwà bàpetè dikùmbànyina dyònsò adi dilòlò edi mu Kilistò, Dîyi divwijiibwe mubidi munkaci mwètù. Enzàku nànkù, Mukalenge. Ndi mbàlàmbula Kùdì, mu Dîna dyà Mukalenge Yesù Kilistò. Amen.

²⁰⁶ Nzambi ànùbènèshè. Nènku panùdì basòmbè bapùwe ànu byà menemene ebi apu, nwamònu’s, ànu katanci kakesè cyanààna; kaa, ekèlekèlè, ndi mupicishe dîbà dyànyì nè tusunsa tùtaanu mpindyewu. Mfwilaayiku luse, ncìvwa nè meeji à kwakula ntàntà bule nànkù to. Ndi nnwàmbila, twánjàayi ànu kwindila bwà katanci kakesè cyanààna, mpèèshaayi ànu tusunsa tukwàbò tùtaanu cyanààna bu nwènù mwà kuswà.

²⁰⁷ Mbanganyi bàdi bamanyè cyàkadì Nzambi? Tudi bamanyè cìdì Bible mwambè nè ke civwàYe, nè Bible mmwàmbè nè: “Yèyè ùdì umwèumwè awu makèèlèlè, leelù, too nè kashidi.” Nè Yesù wàkamba, mu Yone Munsantu nshapità wa 14, mvensà wa 12, Wàkamba nè: “Ewu udi ungiitabuuja Mémè, byenzedi bîNdì ngenza yèyè neàbyènzè pèndè.” Kì ng’ewu udi witabuuja byà buđingibudingì to, kàdi: “ewu udi ungiitabuuja Mémè.” Ncyà bushùwà anyì, nwènù bambi naanyi? Aci’s ncilelèlè. Mbabadi bàà Bible bùngì kaayi bàdi bamanyè nè aci ncilelèlè? “Maulu nè buloba nebijiminè,” kàdi Mèyi Èndè kaèna mwà kupangilaku to. Yèyè ngudi mulayè aci.

²⁰⁸ Mpindyewu kùdì, kakùyì mpatà to, babèèdì munkaci mwènù amu. Ncyèna munùmanyè to, nànsha kakesè. Nè bwà kujaadika ciinè cîmvwà ngàmba kùkaadi katanci aci, bu mùvwa Mwanjèlò wa Mukalenge mu matùkù à kale awu, matùkù àkaadi mapite awu, Yesù wàkamba nè: “Ànu mwàkadìbi mu matùkù à Lotà, ke mwikalàbi kàbìdì ku dilwa dyà Mwàna wa muntu.” Nudikù mwà kumòna cîmvwà ngàakula aci, mènà awu nè bikwàbò byònsò bilondèshìle myaba, Èkèleeziyà musòmbè bîmpè, nudikù mwà kucimòna anyì? Mpindyewu ndi mutwishiiibwe nè nudi nubadila munkaci mwà milongo yà bintu bîmvwà nciyi mwakùle to, nudi bumvwè cîmvwà muswè kwamba aci’s. Mpindyewu nwènù bàdi mwab’ewu aba, biikàlè nusaama nè biikàlè mu lukèngelu, mémè ndi . . .

²⁰⁹ Mbungànyì bùndì mulwile mwab’ewu? Ncinyì cîndì mufwànyine kwikala mwimànyine mwab’ewu, bu museeswishanganyi? Bu nè mvwa ngenza nànkù, dîbà dyàkànyì dyà mémè . . . Ncyèna—ncyèna—ncyèna njinga kwikala nè mwoyi

to. Mbipiciibwe nè mèmè—mèmè—mèmè mufwè. Bìvwa bitàmbe bwimpè bwà mèmè—mèmè kwikala mupàtuke nè kwikala ní ncinyi cikwàbò cyònsò pamutù pa kwikala museeswishanganyi. Kàdi Nzambi neàngenzèlè cinyi? Nè ncyèna mumanyè nè nèngiikalè nè mwoyi bufùkù bujimà ebu to, nànsha nwènù pèènù. Kàdi museeswishanganyi, tudi baswè kwikala. . . Bìdi nè dikwàcisha kaayi bwà kwikala museeswishanganyi, paùdi mwà kwikala mushùwashùwâlè? Kàdi, nudi numòna's, Bìdi byà pabwàbi be kunùdi.

²¹⁰ Mpindyewu, tàngilàayi, pùikalàbi nè ndi ngàmbe nè Mifundu eyi yìdi nè cyà kuula, yìndi mubalè nè munùleeje mu malòlò àbìdi mashààle aa, cìvwà Yesù, cìdi Bwikadi Bwèndè mpindyewu aci! Nè Yèyè ùdi nè cyà kwalukila mu matùkù à ndekeelu, tudi bamanyè nànkù, ku mubidi wà buntu, nè kuDìmanyisha mùshindù wùmfwèwùmfwè awu. Twètù bònsò tudi bamanyè aci. Tudi bacimanyè anyi? Ambàayi nè: “Amen,” pùikalàbi nànkù. [Disangisha didi dyàmbe nè: “Amen.”—Muf.] Èyo. Mpindyewu bwà busàmbi bwènù, ndi nnnwàmbila, ndi nnnwàmbila eci, mu Dìna Dyèndè: Yèyè ùdi kaaba aka, Nzambi umfwèumfwè wàkatùùluka nè kwakula nè Abraham awu, uvwa mwelè nyimà Wèndè ku ntentà awu, kàdi Sarah munda mwà ntentà amu, Ùvwa mumanyè cìvwàye wèla meeji aci.

²¹¹ Wàkamba cintu cìmwècìmwè aci pààkalwàYe pànwàpa. Wàkatàngila batèèleji nè kujingulula cìvwà mu mwoyi wàbò. Mukàji kampàndà wàkalenga cìvwàlù Cyèndè; Wàkakènzakana too nè pààkamupetàYe, nè kumwambila.

²¹² Mpofo Baatimàayò wàkalenga cìvwàlù Cyèndè, pààkeelàye lubilà nè: “Wèwè Mwànà wa Davidi, ikàlàku nè luse,” mwimànyine kule nè mwaba wùvwàYe ùpicila mu ntantà wa metèlè lukàmà nè makùmi mwandamukùlù nè byà mu njila. Diitabuuja dyèndè dyàkiimanyika Mwànà wa Nzambi, mu njila amu, nè kukùdimuka è kwamba nè: “Lwàyi nendè mwab'ewu.”

²¹³ Zakàayò mukesè ewu kuulu kwà mucì aku, musokòme, kwambayè. . . nànkù kàvwa wìtabuuja nè Yèyè ùvwa Mupròfetà to, yèyè pèndè. Ke Yesù kulwayè buludi, kwimanayè mwìnshì mwà mucì amu è kutàngilayè muulu, è kwambayè nè: “Zakàayò, tùùlukà,” kumubiikila mu dìnà dyèndè.

²¹⁴ Pàvwà Yesù kacya kàyiku mwanji kumòna Peetèlò to, kàdi Andèlè nguvwa muyè nendè kuntwaku. PààkaMumònàye ùlwa, wàkamba nè: “Dìnà dyèbè n'Simonà. Udi mwànà wa Yona,” kumupèesha dìnà dyèndè, kumwambila nè yèyè ùvwa nganyi.

Wàkambila Natànàèlè mwaba wùvwàye ùsanganyibwa, cìvwàye mwenzè aci.

²¹⁵ Mukàji awu, nè mu ngiikàdìlù uvwayè ùsanganyibwa, cìvwà lutàtù lwèndè, cìvwà disaamà dyèndè.

216 Aci's n'Nzambi, balundà bàanyi! Mbanganyi bàdi biitabuujà aci nè mwoyi wènu wònsò, bàmba nè: "Aci cidi nè cyà kwikala Nzambi"?

217 Mbanganyi bàà kunùdi mwab'ewu bàdi bamanyè nè ncyèna mumanyè kantu nànsha kàmwe pa bwalu bwènu, elàayi cyanza muulu, ambà ànu nè: "Ndi mumanyè nè muntu ewu kî mmumanyè kantu nànsha kàmwe pa mèmè to, ànu—ànu yèyè ùdi ànu muntu wetù ewu"? Aci's ke cindi, ànu mwanèènu wa balùme. Ndi mwab'ewu bwà kuteeta kunùkwàcisha.

218 Kàdi ndi ngàmba patòoke! Mbanganyi bàdi babalè mukàndà wànyi nè bikwàbò? Nudi bamanyè's, nudi nwitabuujà nànkù, nè m'Bulelèlà anyi? Aa mmatùkù à ndekeelu. Nènku mpindyewu Mukalenge Yesù àtùkwàcishèku.

219 Nènku bu Yèyè mwà kulwa dilòòlò edi . . . Kàdi nànsha umwe wa kunùdi kàtentemuki to. Shààlaayi nwènu ànu mu nkwasà yènu munùdi amu, nè itàbùùjaayi, nè Mukalenge Yesù neàlwe dilòòlò edi nè neàshindikè bintu bìdiYe mwambè ebi, bintu bitùYe mulayè ebi. Bu Yèyè mwà kubishindikila nè m'Bulelèlà, nenùMwitàbùùjè anyi? Itàbùùjaayi!

220 Taatù wa mu Dyulu, mpindyewu nyèwù ngàkùlù Bwèbè, cyùvwà Wèwè aci, cyùdi Wèwè aci. Mpindyewu Udikù ànu mwà kulwa kumpalà eku kumata mu cyalù anyi? Nè bantu bàvwà basòmbe mwaba awu abu mu bateèleji mwàmwa, beenyi ànu menemene, Udikù mwà kuDimanyisha kutùdi dilòòlò edi, Mukalenge, bwà twamòna mwà kumanya nè kujingulula nè Mifundu eyi mmyùle, nè "Yesù Kilistò ùdi umweumwe awu makèlèlè, leelù, too nè kashidi"? Dìbà adi piikalàbi nè tudi nè mwoyi mu matùkù à ndekeelu, mwàkambàYe nè Yèyè ùvwa mwà kuDibuulula mu matùkù à ndekeelu, ànu mwàkenzàYe ku Sodomà kumpalà kwà mwànà mulaya awu kulwayè kùdi Abraham, èè, Dimiinu dyà Bukalenge dyà Abraham didi munkaci mwà kukèba Mwànà wa Bukalenge adi, cintu cìmwècìmwè aci's ncifwànyine kwenzeka. Nènku tàngilàayi nànsha mene myaba, cikondo, mènà, nè byònsò mbipwàngàne mu mulongo, Taatù. Tùkwàcishèku, tudi tulòmba, mu Dìnà dyà Yesù Kilistò. Amen.

221 Mpindyewu ndi muswè bwà nùsambilè, muntu nè muntu wa kunùdi. Ànu cyònsò cidi cìbi aci, nùMulòmbaayi ànu cyanààna. Mpindyewu Yèyè m'Mwakwidi Munène.

222 Byòbi biinè, mbambi bùngi kaayi bàdi mu nzùbu emu, elàayi byanza byènu muulu, myaba yònsò? Ngèela meeji nè bàdikù makùmi àsàtù anyi makùmi ànaayi. Mpindyewu mbanganyi bàà kunùdi bàdi bamanyè cyòci eci, bwà nè Mukàndà wà Ebèlù, mu Dipungila Dipyadipyà, ùtwàmila nànkù mpindyewu mene nè "Yesù Kilistò ùdi Mwakwidi Munène udi mwà kulengiibwa kùdi dyumvwa dyà mateketa ètù"? Nudikù mwà kwela byanza muulu

kwamba nè: “Ndi mumanyè nè m’Bulelèlè. Bible ngudi wamba nànkù anyi”? Ncyà bushùwà. Èyo.

223 Dìbà adi pìikalàYe Mwakwidi Munène, Yèyè ùdi umwèumwè awu makèlèlè, leelù, too nè kashidi. Dìbà adi wèwè muMulengè dilòòlò edi, Yèyè’s mmufwànyìne kwenza maalu mwàkenzàYe kale wàwa amu. Ncyà bushùwà anyi? Ànu mwàkenzàYe makèlèlè amu!

224 Èè, mukàjì awu pàakalengàye civwàlù Cyèndè. Wèwè udi wamba nè: “Kaa, kàdi bu mèmè mwà kucyèenza’s!” Diitabuuja dyèbè dicilengè. Bwà mu mubidi emu, Yèyè kàakadyumvwakù to. Civwa ndiitabuuja dyà mukàjì awu, dyàkalengà civwàlù aci. Diitabuuja dyèbè didi mwà kuMulenga mpindyewu. Nudi nwitabuuja nànkù anyi?

225 Dìbà adi pìikalàbi nè Dìyì dyà Nzambi ndimwènèshìlbwe, Yèyè neàbuululè cintu cimwècimwè aci nè neàleejè cintu cimwècimwè aci. Udi witabuuja aci nè mwoyi wèbè wònsò anyi? Èyo, mpindyewu Mweyèmènaayi ànu, nùMwitàbùjaayi. Kanwèdikù mpatà to. Kàdi ikàlaayi nè diitabuuja kùdì Nzambi, nè Yèyè neàcyènzè. Muntu kampàndà mùshindù *kampàndà*, sambila ànu cyanààna nè itàbùùjà ànu nè mwoyi wèbè wònsò, dìbà adi muntu kampàndà mu *elu* luseke. Nènkù bu Nzambi mwà kulekelakù umwe anyi bàbìdì banùdì bamanyè abu, bìdì kabìyì mwà kupangilaku to, mbanganyì bàà kunùdì bìikalà mwà kwitabuuja dìbà adi nè tujíngulula Bwikadi Bwèndè? Dìbà adi ke cyònsò cìdì nè mushinga. Ke cyònsò cìdì cìkèngediibwà ncyòci aci.

226 Inàbànzà udi musòmbe ànu mwaba awu, muntàngìle, ùsaama disaamà dyà mwoyi. Udi witabuuja nè Nzambi neòndopè mwoyi awu, àkusàngàjè anyi? Udi nè disaamà dyà mwoyi. Aci ní ncyà bushùwà, elà cyanza cyèbè muulu. Ndi mwenyì kùdì, ncìyì mukumanyè anyi? Kàdi aci’s mbulelèlè, èyo, wèwè, inàbànzà awu, inàbànzà wa mvyà ku mutù udi musòmbe pààpa wàwa. Èyo.

227 Inàbànzà udi nè cilàmbà cyà mâyì à matàmbà awu, udi mwelè cyanza muulu mwaba awu, bwà nè wèwè—wèwè... Lutàtù lwèbè mbinyòka. Udi witabuuja nè Nzambi neàkusàngàjè, ku binyòka anyi? Aci ní ncyà bushùwà, elà cyanza cyèbè muulu. Nwamònu anyi? Èyo. Nwamònu anyi? Mbyenzèke ànu nè ùjuulè... Mpindyewu Cintu kampàndà ncilwè pambidi pèèbè, kí mmwòmò anyi? Nwamònu’s, Bukènkè abu. Mbanganyì bàkaadìku bamòne fòtò wa Bukènkè abu? Ke Bwòbù abu bulembelèlè, ànu kumutù kwà mukàjì awu aku. Dyàkàmwè njìyà kampàndà yà kalolo mmikutùùlùkile. Ke cìdì cicyènzè ncyòci aci, nwamònu’s. Nzambi àkubènèshè, àkwondopè, àkusàngàjè. Udi uciitabuuja anyi?

228 Udi witabuuja nè Yèyè mmumanyè cìdì cikutàcisha anyi? Ànu Yèyè ngudi mwà kukwondopa. Mmundidimbi mufluke,

ciseki. Aci ní ncyà bushùwà, elà cyanza cyèbè muulu, wèwè nsongààkàjì. Udi wela meeji mûshindù mûshiilàngàne ndambù kutàmba mûvwà mudyùmvwe mu tusunsa tukesè emu, kî mmwômò anyi? Nudi bamône pâmvwà mwimànyike dibìikila dyà cyoshelu adi, ngènzà nànkù anyi? Ke civwàku aci, civwàku bwèbè wèwè. Mpindyewu bu wèwè mwà kwitabuuja nè mwoyi wèbè wònsò, dipaluka adi nedikuumukè. Udikù mwà kuciitaba nè kuciitabuuja nè mwoyi wèbè wònsò anyi? Nzambi àkubènèshè. Ndàaku, cītàbuùjè.

229 Inābànzà udi musòmbe apa ewu, ùsaama dīsaamà dyà cīfù, udi witabuuja nè Nzambi neākusàngàjè anyi? Ànu lwà ku ndekeelu eku, udi witabuuja nè Nzambi neākwondòpè anyi, neākusàngàjè ku dīsaamà dyà cīfù anyi? Udi witabuuja anyi, udi uciitaba anyi? Èyo. Nzambi àkubènèshè.

230 Mēmè ndi mwenyi ànu wa menemene ewu kùdì mukàjì awu, ncyèna mumumanyè to. Yèyè ùdi ànu muntu mukàjì musòmbe mwaba awu, kàdì Nzambi ngudi ucyènzà. Udi witabuuja nè mwoyi wèbè wònsò mpindyewu anyi? Èyo, ikàlà wèwè ànu nè diitabuuja.

231 Inābànzà udi musòmbe ànu lwà ku ndekeelu eku ewu, ùdi ùsaama dīsaamà dyà kanyonga. Udi nè lutàtù lwà mabwe mu kanyonga, mucima wùdì wùkutàcisha. Byòbì nànkù, elà cyanza muulu. Mwenyi ànu wa menemene ewu kùdì. Aci ní ncyà bushùwà. . . Um-hum. Um-hum.

232 Inābànzà udi musòmbe ànu ku luseke lwèbè awu, ùdi ùsaama, yèyè pèndè. Nudi nuCimòna anyi, kanwènakù mwà kumòna Bukènkè abu pa mukàjì awu anyi? Inābànzà awu ùdi nè dīsaamà dyà twonyi. Ncyà bushùwà. Ùdi nè lulengu lwà mēnyi mu twonyi twèndè amu. Aci cyòcì cyà bushùwà, elà cyanza muulu. Inābànzà udi mukulengè dībà adi awu, ùdi ùsaama dīsaamà dyà—dyà mutù. Nwènu bònsò bàbidì nudi beenyi, kanwèna bàà múnwemu to. Ncyà bushùwà, kî mmwômò anyi? Nudi bàà ku Iowa. Nudi bàà mu cimenga cyà Des Moines. Ncyà bushùwà, kî mmwômò anyi? Udi witabuuja nè Nzambi ùdi mwà kungambila dīnà dyèbè, bu mwàkambilàYe Peetèlò amu anyi? Bu wèwè mwà kwitabuuja nè mwoyi wèbè wònsò! Dīnà dyèbè m'Màndàmù Wolff. Ncyà bushùwà, elà cyanza muulu. Èyo, alùkilaaku mwondòpiibwe mpindyewu, Yesù Kilistò ùdi ùkusàngaja.

233 Nudikù nujingulula Bwikadi Bwèndè, nudi bamanyè nè Yèyè ùdi kaaba aka anyi? Dībà adi nudikù mwà kutentekelangana byanza muntu nè mukwèndè mpindyewu, pàdì Nyumà Mwímpè pambidi pèènu apa. Ke Nyumà Mwímpè awu pambidi pèèbè. Mpindyewu yònsò wa kunùdì ùdi mwà kwondopiibwa mpindyewu bu nwènu ànu mwà kuciitabuuja. Nudi nuciitabuuja nè mwoyi wènu wònsò anyi?

²³⁴ Taatù wa mu Dyulu, kakwèna cintu nànsha címwè cìdì cishààle mpindyewu to ànu diitabuuja. Tudi mpindyewu tulekelela mîdimà yònsò. Pàdì ditàbuluja, ànu mungămbì ku ntwàdijilu amu, divwala dìdì dijuuka pa mâyi bwà kuànyùkusha àya muulu àlukila, bwà—bwà—bwà kuumusha bupidyà mu cyôci aci; mpindyewu pàdì Nyumà Mwîmpè ùnyùkusha bantu útwa kumpàlà útwa paanyimà apa, swákù bwà bupidyà bwònsò bùumushiibwè, nè swákù bwà bukolè bwà Nzambì wa Bukolè bwònsò bùfilè budishikàminyì kùdì yònsò udi usaama dilòlò edi.

²³⁵ Ndi ntàndisha dyabùlù. Sàtaanà, wêwè udi ànu mwena mikaaka cyanààna, nè udi mwediibwe patòòke mwab'ewu mene munkaci mwà bantu, ku cileeki cyà mu Mifundu cyà Yesù udi nè mwoyi mubiike ku lufù. Ndi nkutùmina díyì, ku Nzambì udi nè mwoyi, pàtukà mu bantu aba nè ùbàlekèlè bàye, bwà butùmbi bwà Nzambì.

²³⁶ Bònsò bàdì bìitaba dyondopiibwa dyènù abu, juukilaayi kuulu mpindyewu nwămbè nè: “Ndi ngiitabuuja bulelèlè. Cìdì cyènzekà nànsha ciikàle cinyì, nànsha cyôci mwà kunènga ntàntà bule kaayi, ndi ànu mumanyè nè nêngŭmvwè bîmpè. Ndi ncìitaba, nè mwoyi wànyì wònsò.”

²³⁷ Elàayi byanza byènù muulu mpindyewu. “Twasàkidila, Mukalenge.” Mukalenge àtumbè. Ncyà bushùwà, Mupèèshaayi butùmbi. Mpindyewu elàayi ànu byanza byènù muulu nè nùMutùmbishè bwà dyondopiibwa dyènù, mùshindù wunùtù nwenza mu èkèleeziyà yènù awu. Mwanèètù. . . 

64-0618 Bwikadi Bwà Nzambì Kabùyi Bujingulula
Municipal Auditorium
Topeka, Kansas États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandalà, kulamiibwa mu cikâlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org